

陸陳二先生文鈔



05188

陸 陸 一 一
卷 上 詩
鈔

安道書院藏版

確庵先生詩鈔目錄

卷之一 頑潭集

古今體詩一百二十五首

卷之二 隱湖集

古今體詩一百十四首

卷之三 玉山集 婁江集上

古今體詩一百五十四首

卷之四 婁江集下 鄧尉集 淮南集

古今體詩一百二十八首

卷之五 楚江集 蟻橋集 破山集

古今體詩一百五十一首

卷之六 茗溪集 山樓集

確庵先生詩鈔目錄

古今體詩一百三十八首

卷之七 後蟻橋集 東野集

古今體詩一百二十五首

卷之八 紫陽集 雙鳳集

古今體詩八十九首

確庵先生詩刻於毛氏汲古閣予向有藏本兵燹後


失之同治年借沙谿龔氏不全本鈔錄數冊又假州

學博虞山蘇君望之藏本補鈔二冊與楊君師白敬

傳汪子穉泉承慶慎加抉擇寫成讀本非敢云選也

先生詩刻入婁東詩派及明詩三十家選各有定評

何容復贅按先生詩集之外輯當時隱君子詩為離



潭詩話鈔本好事者倘購而傳之亦足與先生之詩
互相參考云光緒二年丙子仲春之月後學葉裕仁
謹識

確庵先生詩鈔跋

二

目錄終

確庵先生詩鈔卷之一

合肥蒯德模校刊

同里後學葉裕仁編次

頑潭集

起丙戌盡己丑八月

無悶謠 有引

丙戌春予避地任陽區自號無悶道人所居矮屋四
楹茅茨不蔽爨舍臥牀之外虛其二楹以聽風雨地
偏人遠理亂不聞任永之失明杜微之隴閉庶幾近
之時以國恤家憂廢詩不作而卽事觸心有不能已
者乃作謠辭以寄意焉

我有敝廬不蔽風雨容膝易安寧懷故宇我有破衲敗絮其
中紉箴補綴可以禦冬我有小瓢空空自守可以酌水可以
飲酒我有短牀足不能直雞鳴而起嚮晦而息嗚呼何乾何
確庵先生詩鈔卷之一

坤何旦何暮何醉何醒何寐何寤吾目其矇吾耳其聾生乎
吾始死乎吾終

懷黃冠蔡伯仁余乙酉避地主人也

啼鳥三弔欲何之記得當年借一枝張儉外黃亡命日朱家
關內置奴時交遊然諾中途見任俠肝腸亂世知回音白芡
江上月秋風今夜正凄其

除夕

抱影寒潭悵索居驚心駒隙有乘除鄉人祭賽違新臘杜老
衣冠見古初夜聽風聲生怖畏朝看雲影悟空虛棲遲嗚晚
拚霜鬢土室袁閔可得如

丁亥春日奉懷湯惕庵座主

一別愁如雨天南苦戰爭衣冠存甲冑風雪靜蠻營千古君

臣義三年師弟情及時崇令德爭敢負先生吾師於同門中
以道義文章相勉勵每向友稱道朝日言莫真君子也亂後
久不通問近有人述師在義心苦調今世所少因作
此詩懷之并
以自勵云

中夜嘆

蘆中人真義士眉間尺真孝子嗟哉古人其逝矣嗟哉古人
其逝矣中夜思之思淚如雨

對酒述懷座客有泣下者

南冠相對不勝悲甚矣吾衰鬢欲絲海角颶風天有恨風雨
大作舟江頭潮信地無知錢塘江破愁酒盡沾干日避俗歌
師殲焉成續五噫何處尙餘乾淨土此生應與首陽期

還金詩

學莫先於義利之辨義利弗明苟富貴必以賄敗窮
確庵先生詩鈔卷之一

則沮然易喪其守此見金忘躬利乃不利也戊亥之

交予避居周市東偏瀕新塘塘之南有鄰人徐者拾

白鏹五十金越三日歸其主人書識宛然里人詫爲

異聞吾友茂先鼎父惠父輩相與歡忻而贊嘆之萼

青又爲之傳其事予亦欲作文以誌之而所欲言者

已盡於萼青之文乃止旣而思之昔伊尹畊於莘野

而樂堯舜之道非其義者雖千駟萬鍾弗顧雖一介

母取予予今其能乎未能也然則予之有愧於若人

也亦已多矣遂援筆而爲之詩其辭曰

人生大塊閒如魚响水中果腹便有餘何勞致求豐鄙人聞

此理皇皇亂其衷臨財多苟得見金或忘躬比聞草茅下高

義一老農家渺儋石儲而乃能固窮拾遺償厥主慷慨無吝

容廉恥與人心不謀辭自同在昔生民初會真守性性違來
老死絕予奪兩無庸涓薄一殊源巧偽羣相攻安得盡若人
重規義皇風

苦雨

平野綠初翦小山青未明風雷兼曉夜叮嚀失縱橫鼠見銜
羣蹟鳩聞逐婦聲片雲又垂黑何日破愁城

讀易示葑城隱者

我生丁百罹厄運在陽九天地胡不仁萬物如芻狗遺興數
行詩陶情一杯酒上有白頭翁此身肯許友需泥倘致戎徒
爲丈夫醜三復括囊辭庶幾靜無咎

漁父辭

漁潭七十二漁父性蹻蹻茅茨小結廬曾不蔽風雨遠峰在
確庵先生詩鈔卷之一

三

南窗歛卉常門戶漁父既忘世世亦忘漁父袒身捕魚蝦泥
水沒雙股呼婦煖濁酒中夜獨起舞仰占天漢星零落不成
伍援琴一再彈悲風動環堵

郎元翊挽歌

客游瑣涇里揮涕思故人故人具壯志剛性誰能馴倉皇避
兵燹逃竄居海濱海濱入何愚處堂日嬉嬉飲酒兼六博相
與同歡娛朔風日以勁殺氣日以盛喋血到雞狗尙乃徼天
幸吾友明且賢苦爲衆論牽一朝喪頭顱含怨歸黃泉聞君
遇敵至生死視如寄初未乞哀憐但有怒且詈此乃古人義
所惜僅小試親兮不得養女兮未昏嫁篋中舊詩文半與物
俱化風爲蕭蕭悲雨爲盈盈下風雨有時窮長恨何年罷我
來不見君燐火光成羣泣君君弗知呼君君弗聞爲君作挽

歌辭竭傷心多死者今已矣生者將如何

插田歌

西天月初落東天日未生雞鳴喚女奴洗燭燒肉羹解一忽見

東方白旋見東方紅稚子入煙霧小船刺鄰翁解二鄰翁到門

來相呼不相揖雖非風雨天仍然且蓑笠解三荷耒齊下田結

束一何慎下田如下操排布花門陣解四鳴鏡知飯熟大家飽

其腹飯已立斯須好風來樹木解五插田苦日熱日熱炙人背

水熱爛人股解六插田苦可奈何不唱跋遮曲但唱吳江歌解七

唱歌入人耳唱歌動人情貪唱吳江歌種秫錯種稻解八種秫

錯種秫捕魚誤捕蛙腰酒人一壺雙眼都生花解九一日六七

飡膚理無華色對酒不能御舉肉不能食解十抑揄周后稷燠

惱神農氏毒詈秦始皇偏不廢耒耜解十一日沒歸西山結伴

確庵先生詩鈔卷之一四

相與還還又何曾閒解十二力田能勝貧謹身能勝甌古人不

我欺微言起悟者解十三

蓮社招隱詩蔚邨有七十二潭潭皆種荷花思與友人共樂之而

作是詩

日月易化遷晶晶成炎夏茅檐雨乍晴潭水波微瀉心蹟雙

悠然繫艇芙蓉下青青綠葉浮淡淡香風寫此樂敢自私願

為古蓮社其中有妙善所冀能同者

孤桐吟

龍門有孤桐崇幹干天日上有鳳皇鳴離離吐未實桐生胡

不時斤斧賊其質雜沓摧燒之乃與眾卉匹哀哉無蔡邕留
此斲琴瑟

神龍吟

神龍躍深淵變化不一方大乃風雨怒細作指爪藏未見具
所欲畜牧如馴羊一旦烹醢食行道爲悽傷是以至人心澹
然天地忘

黃雀吟

啾啾三黃雀依依朱鳳傍朱鳳旣威垂黃雀亦翱翔二雀游
北渚一雀巢南岡飲啄與羈棲各在天一方一雀飛飛中毒
矢二雀哀哀欲同死

猛虎吟

猛虎逐深林風伯甘前駢偶爾嬰係蹄遂乃絕蹠趨豈寶環
寸蹠以傷七尺軀萬物理良近爲我生嗟吁

次韻荅陳義扶同年

確庵先生詩鈔

卷之一

五

蒙頭咄咄問天行病骨輕於江上萍雨入寒礎秋樹落風吹
殘角夜潮生雞聲空作無端舞雁足難傳不盡情何日月明
相對飲荷花深處一舟橫

翩翩者羽五章二章六句一章四句二章十句報龔與

參

翩翩者羽戾於中路棟宇傾覆巢將焉附豈不懷新終不如
故

翦翦其非采采其藕十畝之間胠足胼手旣食而粟亦孔之
醜上戀白頭下牽黃口任運無心印師五柳

有琴在堂有酒在觴有書在牀可以豫康今我不樂日月無
良

酒旣醉矣琴旣闕矣憂從中來不可治矣

有美一人采桑東阿首垂火齊身佩鳴珂吹氣成蘭吐辭欲
波來我好音扇我微和道阻且遠我勞如何

讀史四首

坤維限中表大化殊尊卑此乃天道然亙古恆如斯舒蓼一
以滅春秋有餘容負乘寇之招暮夜思奪之櫓槍自此始祗
席知何時雄龍耳翕張雌龍尾垂垂二龍今不至誰爲辨雄
雌

白起破長平邯鄲亦垂斃救兵如拯溺晉鄙何遲滯魏客辛
行來公子憇無計時無魯仲連秦已尊爲帝卓哉蹈海節杰
然萬夫勢千金笑不納功成遂長逝

項籍旣喉滅田橫懼爲俘逃入海島間從者五百徒漢王強
相召殺身在中途不惜亡虜苦所惜南面孤二客遂從之眾
確庵先生詩鈔卷之一

六

客與之俱一死頗傷勇三綱賴此扶

炎火丁中衰新莽居奇貨一時頌周公上書相煽和梅福棄
妻遁逢萌掛冠臥陳咸斂書帙薛方守窮餓鵬飛旣寥廓羅
者不得下白水真人興百祿遂重荷南宮繪圖像聲名永遠
播不聞隱鳳徒終作從龍佐

讀陸道威八陣發明

吾聞龐德公寄蹟鹿門野臥龍每從之隕然拜牀下牀下何
如八况乃牀上者時無三顧勤沒齒同啞啞身隱焉用文此
言信非假

五歌

古人歌以言志屈原九之杜甫七之今予僅得五焉
音愈促心愈哀矣

有客有客在他鄉秋風淅淅吹衣裳陶瓶呂桶虛無藏一朝
飢餓凍且僵東西南北魂翱翔牀前月兮地上霜援琴鼓兮
來淒涼懷美人兮何時忘嗚呼一歌兮歌已悲雪庵樵叟知
爲誰

有親有親在東臬硯田託蹟心忉忉種瓜一畝生蓬蒿鬢髮
禿短雜二毛疾病痾癢何人搔我呼天兮長叫號杯有酒兮
蟹有螯老人樂兮毋劬勞嗚呼二歌兮歌轉痛愁烏爲我啼
歸夢

有子有子癡復癡大者不肖勤詩書小者索飯啼門楣尙有
孩幼襁褓持寄食他氏爲人兒治善裘兮弓善箕泉有醴兮
草有芝何必強兮從所宜嗚呼三歌兮歌草草陶家有詩掛
懷抱

確庵先生詩鈔

卷之一

七

有弟有弟在城北居無田廬食無肉結東縹緲罷不讀世情
波瀾同反覆何時出幽遷喬木伯爲手兮仲爲足家積善兮
天降福擇所交兮慎爾獨嗚呼四歌兮歌黷然長枕大被無
人眠

有婦有婦手摻摻紉箴衣袂無寸縑糟糠蔬水常相兼日不
再火突不黔飛蓬井臼愁心添樵有薪兮織有簾俟河清兮
不可占終吾生兮同糞鹽嗚呼五歌兮聲氣極白日爲我寒
無色

桂邨訪陸仲威

山閣虛窗立釣灘春蔬臘醞盡君歡魚吞花影吹波細燕啄
香泥入幕寒秦地桃源閒歲月漢家粉社舊衣冠莫嫌任永
偏忘世時事而今不忍看

仲威
失明

邨居

蘆白楓丹炤綠蘋
粘天波浪自粼粼
愁知日月催雙鬢
貧覺妻孥絆一身
詩卷行吟書甲子
熏爐匡坐守庚申
南山當戶明如髻
相對年年似故人

除夕尉遲廟迎神送神曲五章

朔風吹兮當戶霧
霏霏兮如雨呼童子
兮伐鼓神之來兮不怒

陰陽爭兮龍鬪死
道之窮兮土不制
水渺渺兮寒波邨不煙
兮無禾神將愁兮奈何

捧桂酒兮盈卮
潔吾心兮致辭
齊萬物兮混沌
神不樂兮何爲

神首何兮心炤
遂破涕兮爲笑
嘗余肉兮一嚮
醉余酒兮大確庵先生詩鈔卷之一

醕

八

忽棄予兮欲歸
翔空空兮靈衣
知不可兮流連
嘆窮獨兮誰依

戊子元旦

積霧沈雲晝不開
溪流續續到門迴
芙蓉衣製先民服
楫枻爐煨昨夜灰
凝碧年年摩詰恨
曲江歲歲少陵哀
多情幸有梅花在
轉眼春風徧八垓

寒溪八詠爲盛聖傳賦

出門星在天
入門鳥歸樹
羣動同一勤
當此有心悟

聞咄

閒雲以爲餌
野月以爲鉤
嚴陵較慚愧
多却一羊裘

垂釣

君子非似竹
竹乃似君子
六月清風生
科頭讀心史

倚竹

君道不如鳥
春來啼更好
鳥道不如君
天機獨了了

聽鳥

夜雨一畦綠春風三徑香臨流笑陳仲空爲別人忙灌漑
故人雙屐來清言罪玉屑一夜明燈中唾壺已擊缺話雨
月華凌太虛心蹟非人境徐詠陶潛詩揮杯勸孤影對月
空白渺無際風搖天地寒主人抱微尚不住啓扉看吹雪

邱文眉行腳詩

山哀浦泣動離歌無計維駒奈若何赤腳那能縮地脈壯心
空欲挽天河楚關囊載催頭白蜀道鞋穿濺血多煙岸一樽
春耐綠龍鍾雙袖入煙波

暗顧磨士盜警兼讀織簾居詩卷

二氣混沌萬物錯梁有禿鷲林有鶴古之盜賊畏仲弓今遇
仲弓色不作古之盜賊畏彥方今遇彥方探其囊一身以外
皆長物人情當此恆旁皇先生養氣得其理我心不動只如
確庵先生詩鈔卷之一

九

此揖讓從容整且閒揮卻青氈似糠粃篋中舊製詩三百擲
地琅琅作金石笑語羣盜勿毀傷此吾至寶君不識幸得留
藏遺野人披卷樸素傳幽貞雖然未必篇篇酒也應還是義
熙民

得劉映薇先生殉難消息

十年游宦著能聲萬里孤忠不爲名我亦辱稱門下士心喪
三日哭先生

蔚邨八勝詩同石隱寒溪桴亭作石隱有序

蔚邨在崑城東北三十里地遠而僻水道紆折無鄉
導則不得入焉相傳爲有唐鄂公尉遲敬德躬耕處
陳頑潭卽其故宅趾潭之陽有鄂公祠土人奉爲社
以祈風雨賽禱每著靈異土風儉陋薦僅蔬菜確庵

易以血食更謀鼎新之祠前雙柚樹作門祠下有井
甃磚爲苔蘚所蝕蒼碧粼粼井中有神甃一時浮沈
水間人欲取卒隱不可得邨田修廣千畝窪而頗腴
作隄四面圍之水旱蓄洩是賴內爲潭七十二悉種
荷花而陳頑潭爲之長其大浜則邨潭之不稅者故
土人不種荷公取魚蝦之利秋夜翫月於此爲勝祠
北爲龍窟嘴曾有白龍於此飛去故名更北爲郭母
濃郭母不知何時人也亦不詳其事蹟地以人著大
抵亦賢婦人云楊氏宅卽今確庵迹跡讀書處也嘉
靖中倭寇海上鳳里周公錫避兵居此宅周爲名賢
士人謂此宅前後居停皆賢者亦宅相之善戊子四
月子同桴亭寒溪訪確庵留信宿賦詩贈別雷雨猝

確庵先生詩鈔

卷之一

十一

至吟興未已因指蔚邨八勝每題各賦五言一絕頃
刻而成或稍後者浮以大白時案上止一筆相傳疾
書文不加點八义七步未足喻其捷也惜藥園不與
此會予乃代爲補詩越一月中庵見示和作併附錄
焉王育記

太湖八九峰蔚邨八九潭高深雖異致各恣幽人探

七十二潭尉遲廟

鄂公本英雄胡爲不血食我來薦雞豚洋洋如有卽

古井

何年一古甕寒泉微見影天地悲化遷改邑不改井

楊氏宅

但傳楊氏宅不見草元亭幸得同心者時來共醉醒

四堰

本爲下溼田築隄作防護却使問津人周遭失歸路

雲從龍已去波浪尙千重未許詩人笑終身作臥龍

龍窟甃郭母樓

曾記入村初停橈郭母樓主人歡出迎呼婦餉雞酒

寒冬十二月水淺露微沙漁翁百艇橫袒臂爭魚蝦

大溪

乙酉九月劉河所郭純一婦朱蹈海死友人張元樸簡
予曰此婦人中魯仲連也因爲之歌歌曰

於乎魯仲連蹈海不帝秦高義千古傳哀哉古今人相去何
天淵况乃一女子生死如浮煙獨有郭婦朱矢節以自全時
當乙酉之九月原缺殺入東海邊玉帛載馬後子女羅馬前
忍辱圖苟活行道皆哀憐朱乃從客蹈海死仰天含笑歸黃
泉有女義不顧有夫情不牽江南丈夫幾百萬此舉徧讓婦
人先吁嗟乎婦人之中魯仲連

閏月三日偕陸鴻逸攜花載酒訪瀾漕友人歸舟遇雨

鼓枻而歌

夾岸菰蒲起棹謳夜添新漲足溪流攜尊求友心先醉感物
確庵生詩鈔

卷一

十一

成吟調入秋漁網家家懸屋角野花片片撲人頭倚舷高臥
分蓑笠細雨霑衣更不愁

贈白庵生日次韻

芙蓉衣帔籜皮冠日日青絲白玉盤酒向春風常作主人如
秋月不禁寒花閒坐隱拋碁局溪畔行吟弄釣竿底事夜深
還不寐鵝羣書法翦燈看

訪江俊求口占二首

燈火茆齋對讀書回頭已是十年餘相逢不用寒暄話招我
前溪看打魚
家住蓮花深水灣隨風偶爾到人閒輕舟載得故人酒趁此
月明連夜還

破山瓔珞樹歌

破山之麓興福寺庭有雙珠樹狀爲瓔珞抱佳趣上有虬幹
干青雲下有垂條蒼蒼拂行路傳聞植自齊梁間龍山北澗
詩未刪名賢新聲更間起野人對此怡心顏茲樹篤生有妙
理左兮開花右結子山鳥不敢巢其巔猿猱鼯鼠不敢穴其
裏豈曰碩果宜留存天地亦若爲爾培靈根或欲斬其根披
其枝當風雜疊摧燒之樹若有靈聽我前致詞泰山山頭千
尺松只今已受秦皇封斧斤柯石遍海內爾樹安得仍以不
材終君不見七星壇前七株檜昭明手澤今何在又不見三
峰數仞丹桂花可憐剗削無萌芽萬物成毀固有數生無望
礙死無怖爾住四高僧前千百年間吾此言當恍然

責子

家世本南渡隱德代可數遺傳守一經素風自清舉大人秉
確庵先生詩鈔卷之一

三

剛方言動必稽古父道更兼師訓予繩祖武強勉頗有年稍
稍振其羽如何丁百罹時事多齟齬竄蹟各東西父子不相
顧天地大罪人甘同草木腐肯構與肯堂責望將在汝汝輩
復不材永絕高曾矩中夜味味思涕淚零如雨

飢

愁殺池塘兩部蛙誰家煙火望中斜牀頭夜盡柴桑粟雨後
朝添顧渚茶酒飽三蕉身半軟俗呼酒醉爲軟飽琴彈七日眼生花
西山亦是周人蕨閒較前賢却自誇

蓮花行

蔚洲邨中潭八九問予潭中何所有潭亦無所有但有儵鱗
能下酒潭亦無所有但有蓮花大如斗去年潭水深儵鱗出
沒不可尋今年潭水深蓮花憔悴傷余心此花胡爲以藕名

花花葉葉常竝生月長一節應氣候直與天地相流行又能
儻然出秋水骨幹正直中逕理絢爛之極返太真所以古人
比君子豈其君子亦有窮須臾翻覆波濤中爛死沙泥不得
起七十二潭潭潭同野人素抱濂溪癖思與此花其晨夕花
應怨我來何遲不見當年全盛日我願花兮堅自存但傷枝
葉勿傷根來朝水淺風波息依舊花開滿蔚邨

陸桴亭見贈陶中

王子新裁處士裝製始石隱風涼約略似柴桑濯纓好覓滄浪水
稱服憑添薜荔裳襲美寄來詩作報山公游處俗爲狂醉餘

只恐隨風去露頂人前髮未長

擬邀文介石先生住尉遲廟

寒風獵獵送斜暉雪滿頭顱淚滿衣六詔山川歸夢遠三湘
確庵先生詩鈔卷之一

三

烽火客程非吟殘丹葉空留恨讀徧青鳥未療飢我有寒潭
依古廟不妨老此竟忘歸

荒邨連雨用皮陸感懷三十韻寫愁寄二三知己

先秋十日雨荷笠眺荒郊潭動疑龍窟林低羨鳥巢蘆花搖
蚱蜢桑樹落螺蛸戶駭金戈至窗驚缺騎敲蛛羅張枕畔蛙
吹鬧庭顛荷綠全無益苗青不見梢雷垂如倒馬牆壞似鳴
磬漁具慵歌詠農經倦錄抄飢腸資水濯短髮帶泥派劒鏞
花侵室鞭懸爛及鞘求薪撐板筏乞火繫盃匏羯鼓聲音咽
絲桐韻響膠朝塵甑釜夜夜冷廚庖元亮窺瓶粟坡仙憶
網肴呼天吹土籥祈社擊神鏡候月看箕畢占晴問卦爻白
頭揮涕淚黃口雜喧噍靖莫傾瓢戲巴胡喫酒嘲場頭瓜折
項牀下菌蒸胞有鶴常鳴埵無魚不利包商羊欣跳舞黑蜮

恣咆哮殷后思遷耿周王欲避嶠災同甲子烈田亦戊申拋

萬曆三十六年天啓四年皆大水震澤波難定婁江勢漸交賈生悲死溼屈

子卜誅茅天地頻翻覆陰陽若溷淆愁心山鬼伴詩骨病魔

藪謫陋慚樗櫟迂庸嘆斗筲句憑宗匠削理向大賢教應笑

無高論浮沈任一爬

蝸牛書舍詩

三月大水室無容膝乃攜琴書偕兒徒輩放棹中流

隨意所適潭影空映荷氣襲人漁歌鳥語之中琴聲

書響絡繹聞起徹于田畔遂日以爲常殆古人所謂

泛宅者歟因自號其舟曰蝸牛書舍觸景會心率然

成詠

誤道銀河泛客槎小舸一葉當浮家魚憐人影行相狎蛙愛

確庵先生詩鈔卷之一

書聲靜不講微雨清朝依柳蔭香風亭午坐蓮花兒童長日

真如歲月斷前邨起莫鴉

鳳里顧鄂生嗣子振少年奇孝受先傳之子常贊之中

庵天御又詩之其不朽可知矣戊子春鄂生請予一言

予曰唯唯雖然有諸公作在可無贅也夏遇鄂生于直

水又謂予曰吾子尙年少氣質未定冀君一言俾相勉

爲善人不亦可乎斯言也鄂生眞長者哉子也孝子父

也賢父矣遂直陳其事而爲之辭

天道可必乎仁者必有壽天道可必乎仁者或無後無後而

有後天道仍不苟善人顧鄂生幾作鄧家叟猶子承宗祧名

振字子厚是時志學年奇孝天所授鄂生病且劇引刀腹可

剖倉皇不得肝遂乃刳其肘血性通神明病者終無咎縷縷

痕如絲見者欲驚走至誠挺奇行豈曰出矯揉鄂生真有兒
傳徧里人口刺史表其閭邑乘垂諸久顧華有名篇此事定
不朽傷哉教化夷風俗日彌醜誰念餅之罄負恥及疊岳德
色父供鋤諄語母取帚還問通都中有此獨行否且喜鄂生
意退讓不敢有吾子尙冲齡未能保厥后願得君一言藉以
堅素守此言更有道舉筆殊自忸遙贈直質辭臨風一拜手

八月刈早稻

飲食取充腹求者何皇皇學稼未逢年餒也固其常閉關蝸
牛廬煙火微通光八月秋正中早稻裁登場力田二畝半納
稼不滿箱晨炊薦社公宵春餉高堂尊親畢所願乃同兒女
嘗知足便自足大烹非所望

題與參晚翠庵

確庵先生詩鈔卷之一

五

閱盡人情萬事慵靜中詩卷日從容慣迎賓客花開犬粗識
君臣架上蜂釣雨及辰蕉當笠著書經歲筆爲農庵題晚翠
何人伴却有黃冠號澗松

東隣羽士
龔澗松

秋聲

秋聲吹不寐起視正宵中窺甕看飢鼠啼花聽亂蟲露含雙
樹白月借一燈紅可嘆韋端已行蹤似轉蓬

己丑元旦送徐次桓之桐江三首

管領春風酒百壺送君煙雨一邨孤不知此夜桐江裏尙有
當年釣艇無

何處當年許劔亭曰雲源上白雲深憑君寄我西臺泪碎盡

江頭竹石聲

兩湖山上兩高峰無限離愁有夢通遙想過江風雪夜梅花

一路月明中

春日

春上晴溪冰腹開山邨煙景暗相催枝頭有鳥窺虛牖門外
無人掃落梅餉米一蓑衝雪去市魚孤棹帶花回久知學道
能忘世只恐猶添萬恨來

斯友堂詩

己丑孟陬同人集蔚邨講易石隱以事不至屬予爲
作斯友堂詩客去不寐翦燭直書遂得百韻

既爲萬物靈自稟兩儀秀五性初感通遂與物欲媾眾形役
一心下乃夷禽獸此理在結繩微妙無人逗自從羲皇來羣
聖相左右八卦畫其先洪範敘其後人極一以立萬古開迷
瞶尼山老布衣厥命實不猶歌鳳志填膺獲麟涕橫袖剛述
確庵先生詩鈔卷之一

夫

兼贊修神功無滲漏爲天植斯文上帝可其奏大道麗日月
燦乎如白晝弟子三千徒四海羣輻輳千古一大朋心法傳
薪燭奈何微言絕大義遂乖謬羸秦并六合一火毒於寇漢
儒傳糟粕經學僅釘餽司馬壞河淡羯羌滿在宥南朝尙風
華國祚遞不祐詩賦盛三唐蒼生何所救趙宋文明開絕學
續其脰太極與西銘暗室孤燈透明道顏再生伊川子興復
晦庵集大成奇功一原收傷哉諸儒沒儒途又雜採明興三
百年文成發其輶不免閒微沙何況諸末流憶自丁丑歲吾
黨相結究或探萬象源窮理幾天授或交戰而勝道體肥不
瘦或靜默無言淵心如井甃或比春風和醇德飲醇酌或捷
如發機或滿如引穀或銳如輪攻或堅如墨守禮義當干櫓
詩書作甲冑班班實有徒一一符立宿尤愛石隱翁求賢甚

於購荆闢斯友堂羣英日馳驟芝苓備諸籠騏驥畜諸廢方
爲吾道慶忽爾蛟龍鬪海嶽盡翻飛大廈墮結構鼎湖痛莫
攀天位乃南狩前轍旣傾摧後車復顛覆時勢累卵危舉朝
充耳衰蟋蟀鬪平章黃犬吠侂胄百姓怨湯火腹誅而詛咒
引傾敵國兵望之如望后朔風動地起棄去直如猷漢德重
見思天命反不又非無玄永旗旋興亦旋仆披髮走荒郊小
子多僂僂破涕強爲歡枕上啼痕溜采菊傍東籬開窗見南
岫魂乎不歸來甘心伴猿狖足進惟趨趨口言終誼譎心彼
馬牛尻樂此雞鶩味寥寥二三子歲寒鼻自鼻需沙且需泥
不徑并不竇碩果僅能存意者天所穀石隱閉門垣桴亭種
橘柚寒溪焚衣冠藥園事耕耨餘亦雅能軍謹身逾斥堠縱
爾洞風塵君子亦何陋泰伯入荆吳周禮相習狙箕子治朝
確庵先生詩鈔卷之一

鮮風俗革其舊管寧在遼東亦復陳俎豆摩刀刮乾膜揚炭
熨坤皺時時風雨中訪我荒簷露每攜芝蘭香以逐海上臭
翦韭但烹葵信宿肯停留王君更好學覃心藝文圍論道剖
儒墨學古通篆籀正月春始和吹律中太簇頑潭蓮社開講
易闡復姤空谷無足音我心怒如疾遙屬堂中詩野禽強一
雌嗟予本蓬材所恃衆麻侑瀾溪多古風隱者煙雲湊克已
有同心相約共勉懋實爲痛胥溺畜艾備灼灸乃思朋友樂
當爲人事首父子所不傳兄弟所不售夫婦所不謀君臣所
不覲朋友苟義合大小皆可扣樂善誠觀摩規過非厲詬所
以朋友倫實補五倫謬縞帶與紵衣相知在邂逅雷隙膠漆
堅白首同新邁生有彈冠貢死有分宅邱青松柏心霜雪
乃逾茂良哉王君意不屑爲小就旣採鄉國瑜復攬九州琇

還念一堂中皎然別宇宙不復戀膏梁何心被文繡但願諸
同儕竭力相盪漱如行必赴家如飢必舂糗學問日益宏德
業日益富顯晦適機宜剛柔應物候陽升鳳鳴霧散虎豹
吼請以此數言永爲此堂壽

魯國圖詩

有序

歲己丑與同人爲講經社葉白泉先生聞之仿宋謝
臯羽意屢其紀綱捧夫子像與定海所摹魯國圖見
遺侑以和臯羽詩翫樂甚爲距躍三百乃敢拜而受
之蓋臯羽當德祐之後與講學方吳諸公游遺以是
圖厯四百年所先生秉鐸其地好而求之神物復還
石缺字漫幾不可辨搨其本藏笥中久一旦出以相
贈豈所謂天下之寶與天下共之者耶昔人好觀山
水名畫謂之臥遊今得是圖每一展對如入闕里坐
舞雩此其樂豈止山川草木之勝而已月朝十五日
敬懸草堂瞻拜興俯一如方吳諸公以仰成先生與
人爲善之意因依前韻奉贖一章兼寄同社諸君子
共和之將以是誇於田夫野老焉

寶物幸相其燭天光氣新恍疑龍馬象重出大河濱被髮思
先隱依牆見聖人周行真好我慚愧是天民

和陸辛庵蔚邨夜話時辛庵避公車不上

一篙溪水漲春潮喜有龜蒙破寂寥書卷明燈聽急雨酒杯
短劍照深宵髮長白似三千丈蔬短青無十二條君是北溟
魚化鳥不能飛去伴鷓鴣

和辛庵寒食二絕句

廚煙寂寞斷晨炊非爲當年義士悲
嬾向鄰家乞薪火對君酌水漫題詩

家山野哭墓田中目斷城南淚血紅
馬鬣三年霜露裏紙錢若箇掛春風

陶九臯遠遊言別忽修弟子禮賦贈

久稱兄弟接杯卮牀下重修北面儀
君自虛懷能問道我慚大患好爲師
四方投分宜矜慎千古傷心是亂離
家在暮雲歸不得殘山剩水繫人思

悲洪都

擊鼓莫擊少卿鼓拭劍莫用南昌土
蛇不成龍虎變鼠猥猥大笑天公苦
馬騰騰旗翻翻營後戶失前門矢折
鏃車敗轅南昌城頭鬪饑哭鴉鷓鴣
夜夜啼人屋烏鳶公然食人肉

確庵先生詩鈔卷之一

昌國衛

九

昌國衛今日屯兵昔置吏落伽山昔時佛國今虎關
虎關崩摧無人守銀臺金闕夫何有木石勞勞精衛心
一朝風雨三光沈三光沈六龍去龍子龍孫在何處
夜潮排盪鮫人淚

感而有作

諸合甫約其宗人鼎甫惠甫莊甫月吉告祖悔過遷善
孤將忠孝續先傳誓墓文成告几筵
五世衣冠君子澤百年譜牒後人賢
門風恥與時流伍心史勤修國事編
海內只今誰舊德葦家花樹尙依然

宿顧雅儔草堂二首

幽人住何處墨莊東復東卷簾看曉日
散帙坐晴風客話烹蠶豆僧過翦鹿葱
一時偕隱樂可似梁鴻

結茅邱壟畔孝義古人家放犢依深樹尋魚背小义花香鳥
語細基靜日光斜秉燭無言處空庭一夜蛙

和白庵歸徑

徑繞蓬蒿罷翦鋤就荒吾亦愛吾廬蒸藜餉婦攜新酒分火
鄰家讀舊書社散人歸疎樹外山晴鳩喚落霞餘江潭憑弔
年年淚又見榴花照眼初

予家潭上目擊邨人日不再火乃創爲周急法惠頗不
費重午前一日年友葉嶂初忽遺余粟卽公之邨人書
以紀之

牢落天涯弟與昆忽推仁粟到衡門爲君市義寒潭上散作
春風滿蔚邨

五月十三日織簾小集以周程張朱分韻得周字

確庵先生詩鈔

卷之一

三

織簾居中花四周織簾先生何所求梅子乍肥還帶雨竹枝
初醉已含秋白雲盡日堂前合碧水經年戶外流荷笠歸來
殊自得田園蕪盡不知愁

次韻東坡岐亭詩

大塊稟羣生含吐陰陽汁痛癢其摩搔水火齊燥溼貴賤縱
有殊靜觀皆自得割彼以自肥毋乃非所急昔稱右軍鵝又
聞颶蒙鳴寄託見幽真豈其膏鼎冪哀哉口腹人刀几淋漓
赤下箸輒萬錢嗅以鼻端白膾蟹斲其筐脯蝦脫其幘寧知
湯鑊中盤旋不能泣我受孔子戒疏水或時缺我承考亭教
喫茶款嘉客養茲樸素心古風庶遙集

家人以已卯落卷糊窗用宋林景曦韻志感

雲樹臃腫日正東照來殊卷十行紅故朝封事今何在應與

山窗護曉風

景曠有山窗新樹故朝封事時今用其語

懷顧中庵織簾居

結廬煙市近心遠斷聲聞香自茶靡入青從薜荔分竹深遲
引月牆短易過雲遙念藜牀夜齋心箸述勤

水國詩和顧伊人

下澗年年稅未成樹頭布穀枉催耕何須毒霧愁爲雨乍得
輕陰喜當時蕉葉滴殘鄰婦淚荻花吹斷野樵聲無端社燕
辭巢去定怪當門一棹橫

諸庸甫家社飯

雙扉煙雨閉菰蒲蓮社懷心避世徒家學束生移泛宅身同
漫士老杯湖留賓截髮成佳話對客揮毫入畫圖疎磬一聲
纔住處隴頭歌唱起樵夫

確庵先生詩鈔卷之一

五

舟居

田園蕪廢水滂溪羸得無營日就閒十指懸椎紅蓼裏一家
炊飯綠荷閒火雲乍盡愁飛鳥雨氣全收見遠山鄰叟不知
何處去數聲羌笛釣魚還

次韻劉文成夏日雜興七首

先是戊子與參向辰子音皆有和作家大人亦和之
今夏苦雨不能對書遂邀白庵同和以消永日

扶疎薜荔當籬垣颺母風吹雨打門碧浪似雲翻白晝青燈
如夢照黃昏兵戈未定書巢破煙火裁通土鏹存今日落花
誰作主却令銷盡黯然魂

邨邨水漲柳花餘夜夜鷓鴣鬧索居兒子弄船行賞酒山妻
插漚學求魚占晴欲廢田家歷種樹慵抄先隱書羸得北窗

高臥穩問津已斷故人車

清齋日日愛炊糜留作高陽歲歲悲久溷茵如衝雨笠乍晴
人曳看雲藜眼枯芳草王孫淚腸斷西風帝子旗記得去年
三月裏一場春夢繫人思

菰煙蘆月恣清遊茶竈書牀盡日留茆屋未秋風已破秫田
多水雨先愁說經不到無雙地求友都逢第一流何必漁陽
能寫恨夜深蛙吹鬧牀頭

綠波渺渺暗荒郊日與忘情草木交蘆葉一灣圍鷺宅蓮花
千歲老龜巢移牀就樹雲爲枕倚竹懷人月滿梢不用勞勞
叩管尹十年前已決誅茆

斗指南丁秋又催幾衡往復動澆哀星侵帝座何年見慧帚
旄頭永夜猜西蜀青盲將皓首睢陽白骨長蒼苔最憐野老
確庵先生詩鈔卷之一

無窮淚都付江頭酒一杯

采蓮新社做天池物外同心學道宜止酒久慙根矩介盜牛
差畏彥方知一潭雲淨波生處十里香來月上時我欲忘眠
客忘去幾回潦倒碧筒絲

秋水

夾岸蘆花秋水清桃源寂寂少人行霞明山鳥獨歸去雨歇
林蟬齊有聲舍北敗荷當鏡立牀前纖月倚空橫比來天地
多憂患落葉金風一夜生

今歲佃田十二畝以三之一種秫以其二種秫疊遭

風雨一望盡白已心置之越三日復有青靄波浪中
者非分所獲逾于大有家畜童子二晨而出午而歸
灑掃之餘兼薺茶蓼人日一二行止適瀾上諸君采

蓮禎潭之上見而嘆曰噫時將秋風并日而治其尚
可及吾助汝庸夫乃呼其一僕一婢至且了則呼其
弟之僕至白庵則命其佃兩人至窮日之力遂以終
畝巨攜蔬挈飯而來不煩吾酒餽餉也此一役也諸
公共有三代之風哉顧予何能坐享公田之利既深
銜戢行自媿也是日白庵有詩見貽因次韻和之卽
以爲報

插秧頗費工薅草頗費日風雨一朝來生死爭瞬息是以天
與人其數常不敵吾家兩奚奴溼毒爛雙膝此亦一人予何
忍殫厥力戴星日往還奴亦頗勤飭獨歎兩人遲不及多人
疾厚意感君輩亞旅呼相給鄉約如藍田高義同緩急邈哉
思前修生我慚愧色南州徐孺子非其力不食敢當公田利
確庵先生詩鈔卷之一

一家八家役

毛子晉載書攜酒見枉却贈

水漲衡門臥野漁雙橈攜酒扣吾廬花知愛客香先動月爲
留人影尙虛龐老肯容牀下伏中庵王郎欣受篋中書獨悲
慟哭西臺記何事鐫成十載餘

晨起

銀漢迢迢星在天貪看月落不成眠鄰翁入市忙回棹報道
兵符又捉船

奉酬陸巽庵十二辰體詩

不願生作永州鼠但願牛角千番紙公然晝虎行市中屏蹟
當如脫兔駛六龍不復御天飛一蛇甘自焚山死門外喜無
車馬喧掃徑惟待羊求耳舊恩戀戀供奉猴中夜雞聲拔劍

起狗苟蠅營何足云一豬不捨尙如此

和陶咏貧士七首答陸翼王兒贈

結廬水中央漁叟相因依小舸薄茭叢坐釣斜陽暉孤鳥失
其羣啣哀不能飛窮睇緬舊林去將焉歸中宵發浩歎所
感非寒飢白首道無成已矣吾衰悲

憂世固戚戚樂天亦軒軒素心卜南邨雅集追西園區區簪
與紱棄去如雲煙有時對周易小窗獨探研悲哉投閣人玄
白徒空言千秋萬歲後誰爲眞聖賢

吾聞陶淵明愛張無弦琴揮杯撫松餘歌咏出天音傷哉先
生沒此道不可尋我生千載後汲古以自斟三復咏貧篇猶
然非所欽忘貧不言貧乃爲達士心

喪亂六七載長揖辭東婁寒潭雨雪中高臥無唱酬我愛平
確庵先生詩鈔卷之一

音

原君所學希程周時時雙魚來必爲吾道憂當世有若人邈
焉寡其儔一城阻千里命駕復何求

十年懷一刺硜硜無謁干肯如堂下囚號呼堂上官種田不
逢年一日不再飡芙蓉以爲衣風露忘其寒恥爲飢所驅辦
此乞食顏雙雙白板扉曉夜永閉關

日月如弄丸寸心如轉蓬頗亦學著書窮愁不能工卓然高
義人漢代傳兩龔餓死棄溝壑苦節慙未同一斗自然合三
杯大道通庶幾或流亞吾願長相從

蔚邨有名嶰更喜無兼州痛飲助清譚往往高人儔吾子天
下士今方第一流胡不一買棹慰此調飢憂新詩旣披吟紙
墨聊和酬願言再申誓皓首同束修

膠水汪昭茲投詩見贈賦謝

客從城南來遺我衍波牋開牋見新詞妙理何芳妍其學本
六經其人心聖賢置諸懷袖中譬彼韋章與弦由來下里音和
者或數千對此白雪調含毫不能宣孤邨風雨夜燈火爲淒
然

己丑中秋將移家隱湖與石隱翼王諸子論六書之學
和陶斜川詩言別

三日秋雨內來往不能休相對非今人曠若皇古遊六書剖
疑義舌辨如雲流精言駭池魚奇響驚沙鷗茲事亦匪細功
成在墳邱許徐何爲者恐非吾黨儔恨不起蒼頡侍坐相論
酬未知子雲亭有此樂事否我年未四十嘗懷千載憂黯然
自茲別好友將焉求

鹽鐵塘別石隱寒溪桴亭默庵

確庵先生詩鈔

卷之一

五

回首愁雲思惘然身分南北淚如泉十年兄弟空雙鬢四海
功名剩一羶看世有心留白眼埋憂無地問青天何時合買
深山住欲借襄陽百萬錢

蔚邨別幼玉且了白民惠甫芻言

蔚洲邨舍是吾家近隔瀾溪路一又雪裏夜過高士屐雨餘
春鬪大官茶丹雞白犬乾坤異碧浪紅雲歲月賒惆悵別君
何以贈年年無恙問蓮花

別梅仙伊人

三年水國釣魚舟一枕騰騰學四休兔腹盈虧弦上下燕巢
來去社春秋簞瓢不輟顏琴樂絲竹曾誇魯殿留今日碧潭
分手處斜陽哀雁可勝愁

確庵先生詩鈔卷之一

確庵先生詩鈔卷之二

隱湖集

起己丑九月盡甲午

己丑中秋移居湖頭村之陶家舊廬毛潛在和陶移居

詩見贈次元韻奉酬

一枝小借棲乃得陶家宅移居挈妻孥樹暝溪將夕入門忘
主賓擁篲爭先役載酒自西林幽光賁中席微雨洗空庭清
言慰宿昔經學非毛公帝虎共誰析
平生寡嗜好好在書詩抗言談孔孟下士大笑之獨有素
心人遙遙百里思重陽風雨候落英正其時望衡共晨夕歡
情方自茲卻燒筆與硯毋爲君苗欺

湖村晚興十首

舊居七十二蓮潭一棹移家湖水南湖水平分潭水碧晚來
確庵先生詩鈔卷之二

添得有山嵐

山南山北落霞紅處處炊烟浦浦風徐聽櫓聲咿軋近賣菱
人叫荻花中

蛙喧雀亂鼓頻搗一片秋風穉穉斜笑指歸雲擁溪樹女郎
齊散大棚車

陶家宅舍背山陂板屋斜曛面碧池預報來秋當種菊呼童
編棘作東籬

湖流東去急于潮蟹舍漁燈取次挑一抹人家是何處鄰翁
指點七星橋

朝從東渡暮西回布衲隨身稱舊裁怪得兒童不相識山僧
何處又歸來

村姑沽酒鬢蓬鬆青布包頭白抹胸刺得小舟輕似葉沿溪

去采木芙蓉

朱莊涇畔見人烟近水雕胡蝦菜鮮隔岸便通汲古閣夜來

聞到賣書船

百家村落號潮頭雲物蒼茫鎖暮愁何必西山有楓葉周遭

霜樹已酣秋

黃面瞿曇叩佛前疎鐘遙與夕春連誰家小犬聲如豹依約

風情似輞川

虎嘍水

殷介平讀徐烈婦張傳作解佩刀樂府以傳其事烈婦許墅關人地以人重矣子因賦虎嘍水一篇以附

于介平之後

虎嘍水何滔滔東南下西北高關吏橫舟作關橋一朝泊估

確庵先生詩鈔卷之二

二

客船暮泊估客船朝朝暮暮估客無數不事詩書而事刀布

秀稟坤貞生此烈婦解烈婦之生實命不猶于歸于徐歲月

未週雉雖其偶山哀浦愁呱呱遺腹亦孔之憂解兒髮日燥

兒年日成娟娟玉立可以慰寡婦之心延師于塾爰授之經

戴星而出戴星而入視我機聲解我生之後遭逢亂離磨刀

霍霍佩以自持解乙酉夏戎馬縱橫止民含義不受辱泣且

罵拔刀斷喉見者詫須臾含笑入地下嗚呼須臾含笑入地

下解六守貞曰節捐軀曰烈二十三而孀居三十二而引決節

與烈兩無缺虎嘍水永不竭烈婦名永不滅解七

衛節庵先生國初侍御也持身清素圖筍茹以見志謂

之二疏圖介平有詩紀其事次韻和之

一瓢官舍囊二簋暮年身獨行非驚眾真清卻畏人幸辭肉

食訖喜共菜根陳賸有遺圖在家風正不貧

庚寅四月遊虞山

載酒過山西雲深谷口迷數峯青自出萬樹綠初齊鳥帶餘
花亂人隨返照低晚風歸棹急回首憶藤溪

不寐爲金孝章賦

凜凜朔風寒皚皚霜華潔耿耿彼姝子憂來難斷絕永夜何
所思所思在天末踟躕空復情誰者訴悲悅譬彼飲川魚展
轉不能說俯觀階下影仰見牀前月炤此深閨心幽光淨如
雪

辛卯花朝嚴仲木招山中看梅風雨不赴夜坐月色忽
佳次潛在韻

鳩居吾亦愛吾廬傳道城春花事初香滿山中遙置酒雨來
確庵先生詩鈔卷之二

三

湖上嬾中車懷人擬續王猷傳種樹聊鈔汜勝書燈火紙窗
青未了一簾華月照衣裾

汎湖

疎樹人家斷復連片帆隨意入新烟湖添夜雨水無定山怯
春寒花尙眠車馬笙簫天上樂綺羅士女鏡中仙愁城聊借
清尊破短鬢風吹又一年

過吳門有感

不泊吳門下星霜又幾回憶車新使舫烟草舊歌臺易入玉
維恨能令庾信哀桃花緣底事還傍戰場開

訪陸履長不遇其尊人子垂先生出心史手蹟拜而讀
之

賣卜何如謝侍郎著書借隱有高堂井中五百年間物跪讀

猶聞翰墨香

滇南路為孝子黃端木作

滇南路八千里外有嚴關十二重內有防秋百萬土前有食人之虎狼旁有深谷荒箐惡溪絕澗苗獠之雜處其險也如此誰其行之黃孝子孝子行此何為爾父名孔昭字含美遠宦大姚兵戈阻絕不得通音問供糝隨孝子念之淚如雨一朝徒步向天涯別去妻孥猶敝屣艱難辛苦得達白鹽井父母見之驚且喜秉燭相看如夢裏孝聲動滇南涕泣或拜跪終奉雙親返故閭往來之期五百三十日而已嗟乎孝子亦人耳乃知天下何事不可為但少至誠如孝子

秋日嘉禾屠闇伯俞右吉張白方潘美含陸冰修諸子

見訪論學於淮雲寺口占贈別

確庵先生詩鈔卷之二

四

弄月吟風興不孤平分吾道與鴛湖一宵蕭寺明燈話欲繪天泉擊鼓圖

寄訊陸麗京賣藥

曹植何曾遇神女陶潛豈肯學閒情陳思雅神賦麗京作注辨感甄之誤子亦有閒

情賦辨與麗京意同千秋自此銷遺恨二陸從來得盛名兄鯉庭死節弟麗京高隱

市上神仙無漢魏山中草木有君臣函關注就方書否醫國

他年內相身

江南曲

江南人烟百萬家王侯第宅凌雲霞徵歌夜夜三秋月載酒朝朝二月花誰知繁華有顛顛如火如茶風雨至西子臺前蔡琰笳莫愁湖上闕支騎吁嗟江南真可哀十載悲歌安在哉烽燧暫銷鼙鼓歇簫管樓船依舊來獨有盈盈蕩子妻年

年歲歲守空帷天高地迴無窮恨花落花開春自知

憶昔三十韻贈吳魯岡憲副

憶昔當陽日維公服政年文章緣吏治綱紀正官聯至止徒
琴鶴供張僅橐籥臣心清似水吾道直于弦力欲傾先否才
堪補積偏三吳資鎖鑰四海望旬宜觀察聲名重朝廷倚仗
專亡何丁喪亂不奈邁屯遭汾社祆祥動薇垣葦宇躔蕭蕭
鳴朔馬跼踖墮南鷲報國無權藉傷時泣涕連伴狂存性命
小隱閉園屢介性追根矩貞風憶仲連雀羅忘貴賤魚腹溷
愚賢蕉鹿貪無著杯蛇避更先眾人皆醉爾老我獨怡然酒
愛沾千日囊羞剩一錢手談凭瘦石茗戰試名泉古德中邊
味南華內外篇道因窮更樂心以靜逾便爲抱江山癖常依
書畫船嚴灘秋弔古禹穴夜探玄艸木觀風土昆蟲驗性天
確庵先生詩鈔卷之二

五

乾

壬辰三月訪黃陶庵殉節所見壁閒血痕縷縷向空拜
而哭之

鈞天帝醉縱難回氣作山河亦壯哉碧血九京懸劔恨素車
雙淚東蜀來先生旣沒微言絕後死誰將狂簡裁還憶方舟
江上語曾於舟中論道可憐絲鬢漸相催

和停雲四章

春暮旣望翼王陸子迓子過嚶嚶地多君子夙奉陶
庵之教旣見談道甚歡越數日將歸隱湖適讀陶庵

和淵明詩多言性命之指因次其韻贈別諸同人匪
和淵明實和陶庵也

我求友生如曠瞻雨誰哉同心關此榛阻既見君子天懷共
撫斯文在茲勞我延佇

陶庵有學聿追鴻濛紹我洙泗軼彼姚江春風在庭明月在
窗爾其以歸執鞭相從

維木有華曄曄春榮當秋而實乃見性情各敬爾躬與時偕
征母爲中道負此生平

魚潛于淵鳥集于柯畝爲尸之扇以微和嗒然忘言一語爲
多春云暮矣欲別如何

林衡者閩中奇士也將歸詩以送之

林子天下士篤生南海隅內挾龍蛇心矯矯與人殊外稟熊
確庵先生詩鈔卷之二

六

豹姿兼兼微有鬚石齋百世師乃出其門閭正學以爲勛日
夕相勤劬道德我所寶文章特其餘大器登明堂爲國儲璠
璣人倫忽道盡宮闕爲邱墟漢法溺儒冠秦令燔詩書丈夫
會有志安能負頭顱掉臂走川谷溷跡於樵漁中夜立空庭
仰天長歎吁著述千萬言幽關踵潛夫頓然念中原靈秀之
所都斯文苟不絕必有賢聖徒芒屨渡錢塘鶻冠過姑蘇析
疑止婁江賞奇來隱湖聯牀述所學不謀乃同符涉筆卽滔
滔矢口皆魚魚當飢與渴飲我有醜酬此樂不可得奈何
賦歸與吾聞子朱子曾與西山俱教鐸振君土風流猶在無
明興三百載子當成大儒吾衰久矣夫讓子以前驅日邁月
斯征古人言豈誣努力追素修闢此荆榛塗

次韻徐次桓胥山草堂二首

萬山之麓必有泉萬水之匯必有川載酒輒過成都宅招隱
先求綿上田草堂有人自太古木榻無語常經年不鑪不扇
者何事研索堯夫先後天

南山之南深復深白雲漠漠春陰陰相國祠堂渺何處有伍
相國漁郎桃花如到今鳥語蛙聲相上下月光燈影同浮沈
遙知此中美人在抱膝支頤時苦吟

次韻金孝章寫怨六首

吹盡參差意未通望夫山下夕陽窮生憎蘭葉戎戎綠坐惱
蕉花故故紅好夢依稀唬鳥後開心飄忽亂雲中合歡繡被
前生話寂寞風光軟轉蓬

倦魂好與睡鄉宜欲下粧樓步履遲拭淚錯應鄰母訊含情
羞語侍兒知蝸涎雨後空成字蟾網秋來倍有絲敲斷玉釵

確庵先生詩鈔

卷之二

七

還不見盈盈一水繫人思

桐露垂垂染墨池千回萬轉不成詞涼生條脫秋風早光撼
流蘇曉日遲墮馬笑看梁苑髻曼蛾愁憶漢宮眉紅顏命薄
應如此腸斷空帷祇自知

倚遍闌干坐曲房簷前小立夜初長回文枉寫千行淚辟惡
慵燒百和香雲雨人閒無楚夢星河天上有裴航可憐結髮
爲夫婦孤負佳期是不將

衝烟獨夜浣溪紗肯逐春風鬪麗華睨曉黃鸝緣底事呢喃
紫燕傍誰家郎顏定向金微老妾面長垂玉筍斜記得漢皋
初解佩也曾相許貌如花

老此羅敷未嫁身琴心空自口挑頻舞衣棄久飄爲蝶歌扇
拋殘化作壓雁帛浮沈千里信鶯花顛顛十分春登樓一望

皆芳草何處王孫愁殺人

孫銘常畫蘭

畫蘭不畫土畫棘不畫蘭前哲抱微尚寄託皆高寒今之傷
心人彷彿同此觀逃禪學劍餘弄筆如僚丸一花一香氣一
葉一波瀾

癸巳春石林上人見寄鄧尉梅遊八詠湖上諸公各有
和章憶子甲申春卜隱潭東流連忘返回首舊遊如前
生事矣感而次之

錄二首

登七十二峯閣

凭闌聊約略七十二高峯影入太湖水不知更幾重風疑吹
掌動霧忽染眉濃對此生微悟乾坤盪一胸

雨窗卽事

確庵先生詩鈔

卷之二

八

簾輿香細細竹屋響淙淙兩急鳥蹲樹人歸花在窗亂雲迷
鄧尉殘夢落吳江濟勝非無具春風未可雙

賦得天寒有鶴守梅花四首

落木蕭蕭遶戶吹梅花無語鶴心知似憐鐵骨難爲別如對
冰顏有所思立破香光人靜後踏殘疎影月明時仙姿拚老
荒臺畔未許春風向北枝

永夜踰躑靜不喧凍雲漠漠倚衡門天涯庾嶺無消息地角
西冷有夢魂餽欲梳時吹片玉爪從舒處點雙痕東風歲歲
相期待何日銜書到故園

豈必巖棲伴鹿麕梅花深處便爲家啄殘夜雨飄紅玉舞罷
春風長綠芽求友只貪香寂寞避人偏愛影橫斜羅浮夢斷
蓬山遠空惹閒愁怨歲華

纔放籠中去故山忽聞玉笛旋飛還春生何處雲千里夜落
無聲雪一灣不忍別離傷歲暮儘容行住似僧閒華陽高士
能銘否瘞骨還須玉照閒

癸巳初夏雨後潛在邀子同石林上人遊虞山諸泉歸
而作詩以紀其勝

五首 錄三首

破龍澗

龍來澗水腥龍去澗波冷長松夾聲音明燈見幡影有僧導
我入花木非人境論詩鬪槍旗日落燭兼秉妙香羣動息悠
然發深省微聞門外喧彌覺山中靜

連珠洞

破山度嶺緣崖路傳道連珠深洞處洞門盤石狀如虎抉眼
摩牙坐煙霧其中忽示一奇觀欲言不言交相顧誰向山頭
確庵先生詩鈔卷之二

九

鑿井幹崩奔風雨波濤注五彩寒光射初旭珠璣大小落無
數參差回互佛燈前狻猊首象王怖乃知天地有大文歎
息徘徊不能去

秦坡

盡道煙光裏秦坡一綫明崩雲山有語屑雨樹無聲谷暗深
眠鹿松危冷墮甃日斜遊未了回首動離情

贈友人二首

曾將杯酒酌弓刀艸奔書生膽氣豪清白故應懷舊德愚忠
豈爲博名高棋敲夜雨爭殘劫鬢入秋風感二毛矍鑠據鞍
人未老印溪明月長波濤

當時風雪避人行長向君家話不平回首遂成千古恨凝眸
已是十年情襟期磊落難兄弟患難周旋託死生我有所南

遺筆在壯夫心事特書明

文介石先生爲吾黨師帥十年於茲矣近黃孝子尋親歸述滇南有路可達先生遂有歸志此邦之人將於誰而問道乎乃賦詩六首以足其行

園橋抱籬久蕪萊祭酒家從六詔來
青火夜迎劉向入絳紗
晨侍馬融開諸生忠孝扶天地都講詩書起俊才
忽報降幡
颺牛渚西風一夕捲堂哀

長江鐵鎖竟何爲中夜旁皇泣素絲
畫日筆隨降表進草玄
人恐獻文遲武陵洞口桃花笑
朱雀橋邊燕子知
獨有孤忠老博士
焚冠和淚寫新詩先生有焚冠詩

荒城斜日數歸鴉南望愁雲不見家
五夜杜陵驚鼓角十年
東信老風沙瓜官粟吏看人事鹿苑雞園度歲華
傳道故山確庵先生詩鈔卷之二

春色好烽烟無恙有梅花

十

十載春風緒論多忘年何幸得婆娑
時從野寺烹葵話丙戌兩會
曾向湖村踏月過庚寅先生訪子隱湖
早帽遼東陳俎豆
黃巾高密化兵戈寇屠呈貢闕門無恙
可憐回首辭官日
落木蕭蕭兩鬢皤

楚水吳山草色微輕帆欲共塞鴻飛
黃冠未遂成仁志皓首還思仗節歸
城郭已移嘒鳥換呈貢城已毀
妻孥猶在故人非
王原至後傳消息黃端未滇歸得信
惹得新愁泪滿衣

尙有將軍出漢關
小朝廷是舊江山
文犀輪貢哀牢國
狂象前驅板楯蠻
鉅鹿馬嘶秦楚際
王官人在亂離閒
歸心且付東流水
待到蒲輪始放還

讀吳梅村宮詹南中雜詩卻寄三首

學士風流當代師
空山明月鶴書時
黃冠投老孤臣志
皁帽

全生千古思出處不言秋水在登臨有恨落花知卽今仗劍
驅車日已賦襄陽北闕詩

十年憔悴雨花臺釃酒狂吟亦壯哉官是曲江悲細柳非關
疑碧詠高槐烏衣日落青山老玄武漁歌白水哀莫歎王侯
無第宅寢園猶見野樵來

金戈鐵馬日紛紛小隱梅花天地分放鶴故人攜酒慣換鶯
道士乞書勤徵書自有歸來賦丞相何勞生祭文不見白門
雙槩急一天詩思動江雲

秋日得同門許琴公劄遙寄

剩水殘山泣暮蛩素書溫語託秋鴻一瓊迎養功名薄

時琴公爲

學雙鬢潛移老大同雪滿舊庭芳草綠劍懸空隴落英紅

來書

云湯夫子無恙
包驚幾物故斷橋明月揚州夜回首凄其是夢中

士

和吳宮詹南中八詠

上方橋

虎踞龍蟠古石頭垂虹重見枕溪流

時橋新修

馬蹏踏去江南雪

蘆管吹來塞上秋幕府岩巖非故國泰壇烟雨一荒邱笙歌
隱隱歸何處依舊雙橈送莫愁

鍾山

蔣山當日寢園開翠柏蒼松王氣迴萬國衣冠和露立九天
鐘筦入雲來卽今石馬悲無主誰復椒漿薦一杯聞道鍾伽
誅戮早秋風靈谷動淒哀

有請開煤鍾山者觀
祭破其謀立斃之

臺城

都城百雉昔今同不見煙雲起故宮翠袖市門驕北語白頭
里社哭西風江豚夜舞鼉龍怒石燕朝飛鳥雀空玉樹金蓮

還在否六朝如夢落花中

國學

六堂禮樂絳紗明稽古曾誇內賜榮
弟子盡傳楊伯起國人猶識鄭康成
燒書有劫儒冠誤釋菜無時野草生
稍喜南廂園叟在亂離辛苦十年情

觀象臺

太史靈臺候日基風饕雪虐土圭移
銅駝實下通侯涕仙掌虛存漢帝思
勝國璣衡昭代法郭制出元泰西律
歷後人疑欒槍枉矢如瓜墮帝醉鈞天那得知

雞鳴寺

燭天光氣御書斜寶誌鬚眉勒漢家
興廢不關今夜月戰爭邊發舊時花
雞鳴山寺悲魚磬鳳去臺城怨鼓笳
縱令高僧確庵先生詩鈔卷之二
開講席蕭條無計禁鳴蛙

三

功臣廟

百戰功高報禮長千秋廟食擬烝嘗
漢家事業推三傑昭代助勞冠六王
尙有龍蛇垂畫壁更無香火到迴廊
雲臺麟閣歸黃土愁聽寒鴉噪夕陽

玄武湖

太平門外後湖深六代繁華記古今
自與邦家存載籍更誰車馬狎登臨
漁歌近罷遊人禁煙水重傷學士心
蕭瑟子山詩思好但愁何處問知音

有懷西田寄王烟客太常

吳塘鴨綠漲波渾一棹西田繫夢魂
屋角荔添芳杜色石埭篁破落花痕
牛宮遠近人歸市佳吹參差月在門
耆舊如公

能得幾布袍松筆是君恩

次韻王太常西田招隱二首

南村北垞犬聲稀綠樹叢中白板扉行踏亂紅三徑濕坐看
遙翠一山微緯蕭蝦蟹鄰漁醉打鼓雞豚社叟圍還有芙蓉
溪上好呼童裁作水田衣
城闌十里客來稀或有山僧夜欵扉望斷綠波漁舍出煨殘
紫芋佛燈微烏嘯柏樹星千點鷺立蘆花雪一圍退谷杯湖
容寄傲十年前已拂朝衣

讀烟客先生西田三十韻詩卻寄

宗彝祖笏舊時春白袷烏巾別業新杜甫正當天寶日陶潛
終是義熙身亂離風物添佳句蕭瑟江關老世臣寄語桃花
好相待可知儂亦避秦人

確庵先生詩鈔卷之二

三

金陵

六代繁華一夢中春光未可怨匆匆司勳債帥朝頻貴相國
軍書夜不通綺閣脂波添漲綠迷樓椒火照天紅長江鐵鎖
知何處斷送先朝百戰功

和毛潛在五君詠次顏侍進元韻 門人錢振注

司空圖

唐政多頗偏幾微最先洞 圖見唐政多醉棄官耐辱競依棲
自號耐辱居上巢賊之辨味獨吟諷 圖與李生論詩有鹽酸
亂士依避難獲免甚眾 常松枝作筆曰石墻驚俗眾幽顯本同源死
松筆示高人 常松枝作筆曰石墻驚俗眾幽顯本同源死
生何足慟 頰為壽藏引故入入墻中賦詩對酌人或難之圖
耶 頰為壽藏引故入入墻中賦詩對酌人或難之圖

方干

寒山壓明鏡來往素心人于鏡湖詩云寒山壓鏡心此處是
掉往返頻射策屢不遇揮毫如有神學士吳子華云把筆一
請素心宰臣張文蔚奏名儒不遇者十餘人雙臺表沈淪鈞
官慰魂氣人請賜一官以慰地下干居其一繪像與廢宅千載後清風自茲馴子陵並

韓屋

冬郎甫七齡小字清聲玉溪見李義山贈詩云雛入直鈴

索驚禁署嚴密內夫人從幸鸞旗眩韓全誨劫帝幸采薇賡

悲歌潛居深林聞郎官使闕越舍桃憶歡宴大慶堂賜燕呈

花下會詩云枕流方采北山薇紫宸不可論惟應夢中見復託言夢中作

羅隱

昭諫數偶奇公車髮空秀叶上不第婦女誇姓名朝廷識章奏

為吳王修謝表有天寒麋鹿日莫牛黃祖幸能容隱見吳王

確庵先生詩鈔卷之二西

云一箇懶衡容不得劉表匪虛覲吳王簡書辟隱曰仲宣歎

息兩同書隱有兩同書後代無人守隱無

陸龜蒙

天隨一怪民自號天隨子翦然抱幽素性好潔几格硯叢腥

笠澤書著笠澤叢書自囚鎖松陵句甫里先生傳云囚鎖怪

唱祝牛未相親躬自胙胙者未招鬪鳴筆茶舉今鬪鳴欄尚

床茶爐掩戶卻擊鮮空腸貯詩賦日采杞菊自給好事家擊

自隨貯古聖賢道德語

懷華天御

懷君秋夜尙湖邊明月微星照不眠老去共悲雙短鬢窮來
交刺一寒羶卽今銜石無精衛終古嘸花有杜鵑回首任陽
風雨棹十年心事泪潸然

雨夜訪馮寶佑

積雨生百愁秋風響林木志士多苦心幽居俯山郭波光晶
渺間菱蒲出茅屋門前五畝畦秔稻新結束扣門驚主人披
衣秉殘燭寒暄各不言開卷對窗竹浹晨具雞黍日斜盡歎
曲朝華不再妍雙丸何促速相期崇令名千秋以為勛

和陸桴亭四十三生日詩

桴亭高卧歲華深萬卷圖書鬢雪侵老去漸逾強仕日亂餘
祇有達天心橫經鹿洞吾儕事象山四十三歲講義利章於白鹿洞坐月龍潭
何處尋陽明四十三歲月夜講學滁州環坐龍潭之上最是窮愁多好句猗蘭重見

感時吟

孤村

孤村烟雨惱人多永日指頤擁薜蘿行處亂雲連遠漲望中
確庵先生詩鈔卷之二

殘葉下微波翠禽避濕梳翎去白燕衝寒布陣過欲理枯桐

對知已青山不見奈愁何

季秋望日率遜兒拜龔安節先生祠

宿將親王盡解戈金川一慟欲如何全身有主寒棲固念母
無家夜渡河書為痼瘵陳事切公曾上周文襄書詩關忠孝感人多

有野古集傳世當時豈暇求名計香火千秋自不磨

和瞿有仲讀史雜詠

有仲詠史諸作拮據婦人挪揄男子寄託遙深風人
之指也然諷一勸百毋乃蹈相如之失篝燈風雨佗
僚不謬因反其意以和之

苧羅山下浣紗人斷送勾吳錦繡春不是扁舟五湖去越王
空卧十年薪

誰將圖畫點蛾螿幸得和親棄虜塵不信但看飛燕在可知
延壽是功臣

四十年間復漢家中興天子最堪誇後星易位前星廢但爲
宮中有麗華

傾城能動雀臺思一炬何煩赤壁師若使當年歸孟德分香
賣履已多時

三分指顧在南陽取婦曾誇黃彥良只爲喬家有殊色風流
公瑾最先亡

江南佛寺一奴才羽檄牀前醉不閉結紵臨春空百尺止堪
高望五牙來

殿脚春風管領奢雷塘添得墮釵斜當時清夜宸遊曲恰和
陳家玉樹花

確庵先生詩鈔

卷之二

六

柏梁災罷起阿房蘭麝塗燒壁柱香正是蓮花生好步已傳
蕭衍入襄陽

明誠夫婦樂無倫金石文章結聚新書散琴亡兵火後可憐
清照嫁他人

唐宮宣事響鈴嚴趙宋纓儀不避嫌祗有聖朝家法好從來
金殿不垂簾

哭同門包驚幾三首

掉臂西山別故園蓬蒿三尺閉衡門只將苦節酬親志聊以
窮愁報國恩江左風流誰尙在襄陽耆舊汝猶存如何一夜
金風衰玉折蘭摧不忍論

馬蹏踏雪醉京華轉眼風塵落日斜公子緇衣逃白社
人碧血灑黃沙公漂零書畫三春舫法勞苦波濤八月槎文

泉路倘逢江夏輩陶定知攜手歎無家

翦燭西窗撥棹回共添二豎送愁來

辛卯訪警幾西山別後子亦抱病經歲忽

驚溝壑先於我不及潢汗薦一杯季子泪垂懸劔恨曹公腹痛過車哀儂身久學石頭石只恐君心不化灰

懷同年包朗威馬萬侯徐定侯許琴公何元長

畫船明月昔揚州尊酒狂歌醉未休投轄主人燒短燭墮鞭公子入高樓人閒事去成蒼狗解角身存漸白頭欲寄雙魚恨無路泪痕常對落花流

抱甕丈人歌爲顧茂倫賦

君不見漢水之陰一丈人灌田抱甕多辛苦辛朝與閒雲出山岫暮隨飛鳥投江濱朝朝暮暮抱不倦飛鳥閒雲兩無戀非無力少致功多只恐機心從此見長安少年豈識此馬如游確庵生先詩鈔卷之二

七

龍車若水一朝失足嬰罔羅請君入甕將奈何達人知己苦不早何似終身貧賤好卽今有客聞其風濯足尙羊以自老

茂倫有濯足圖

雪夜有懷沈伯叙

十年風雨歎飄零木榻遙聞老一經世事已如人鮓甕天心終愛少微星城頭笳鼓悲聲急海上旌旗戰血腥輸與袁安僵卧穩夜深嚴雪舞空庭

詠史二首爲引範作

君不見句踐卧薪會稽日主憂臣辱眞難得一朝吳滅蘇臺焚文種鑄鏤賜倉猝又不見秦王鹿走天下爭捷足高材楚漢兵烏江濺血美人盡黥布蒞醢韓王烹就中獨有陶朱公輕裝出沒五湖東亦有報仇借漢者辟穀甘心事赤松功高

不賞古今理明哲全身貴知止范蠡誠哉閒世豪留侯自是奇男子

鷹化爲鳩仲春月當其學習火尙烈但聞淮北橘變枳不見江南枳變橘從善如登從惡崩渭水難清涇易渾義興周處古豪士一日剪除三害去徐勣十三曾殺人後爲良將功名尊彥章甘作朱梁鬼畫像鐵鎗何足齒吁嗟乎素絲岐路真可悲墨翟楊朱空淚垂飲君酒祝君壽但願成仙跨鶴飛直上瑤池見玉母

甲子元夕同人集尉遲廟文介石先生講蔚村三約限

眞字韻

老屋荒江寄此身鷺黃溪上柳初勻鄭公鄉俗慙君子漢代衣冠見昔人社散樵漁禽語亂酒催絃管月華新武陵尙有確庵先生詩鈔卷之二

六

桃源路瀟朴山川一夕春

瞿稼軒臨桂挽辭并序

甲午春明留守大學士稼軒瞿公之喪至自桂林藩臬大吏令丞以下莫不奔走而拜之國中縉紳先生耆老子弟暨其門生故舊之屬皆束芻絮酒會哭於其丙舍之旁蓋自國變以來士大夫之仗節死難成仁取義其感人未有若此之盛者也當公之在桂也中原鼎沸閩浙瓦解公以書生未諳軍旅首倡大義定策端州此豈復有成敗利鈍動其心哉及乎皇天降禍大厦將傾內則馬吳諸臣外則趙陳諸勛鎮曉夜謹諷以亡桂爲事而公以一老臣拮据其中左枝右梧首張尾決至於嚴關不守溶江四潰逆知勢不

確庵先生詩鈔

卷之二

九

可爲遂乃危坐徬齋幅巾待盡酌杯酒以呼天卻牽馬而不御卒與少司馬從容賦詩同日并命嗚呼何其壯也繇今觀之一君死復立一君則世傑之忠也留守重地以一人當敵則宗澤之志也絕命之辭纍纍數千言則文山之歌也牙將家人慷慨殉難則江萬里之義也死者人之所必不免而公之死則真可謂重於泰山者已僧虔顧子謂余言公生平有至性太公病卜於關壯繆之廟得前三三後三三之詞太公果卒於九月之九日後公謁選都門太夫人病卜於神兆如初時將給事黃門有成命矣棄不受戴星南返以得侍湯藥爲快張西銘太史之過虞山也泊舟東皋之畔聞有孺子哭者哀聲達左右則公以至

日祭其先人蓋每祭必然者也太史爲之感歎不已古人有言忠臣出於孝子之門豈不信哉明與公之長君誼忝同籍而有不見荆州之恨於其喪也乃得拜其儀容想像其爲人而作詩以憑弔之其辭曰
殘山剩水強撐持回首中原竟屬誰鎖鑰無人諸將去衣冠有主二陵知書生義盡平原日丞相名成柴市時子自殉親臣殉國一門忠孝是吾師次公元錡萬里奔赴殉難於粵

平陂天運亦人謀一柱於今砥濁流招隱東皋看舊業籌邊

南國想高樓中營星隕千秋恨遼海魂歸萬里愁不是別山

司馬在下泉含笑共誰遊少司馬張別山諱同徹同日就義江陵之孫

五載經營志未平溶江半壁老空城曾無將相甘薪膽但有

門庭起鬪爭千古人倫存主僕家人陳祥亦破難一時吾道見師生

別山爲公 呂蒙後死無多日 枉與人間罵姓名

昆湖家世濬源長 耕石還餘舊德堂 山水煙雲環丙舍 琴書
冰雪照匡牀 僮亡散佚丹青盡 家中名畫僅輩挈之過去 僧老留存翰墨
香 令子文孫工繼述 不煩胥井鐵函藏

送伊人澄江見其宗人程崑毓崑毓故大俠也

芙蓉城外夕陽斜 一棹秋風沂荻花 山水舊棲離亂燕 江湖
新怒戰爭蛙 輕生魏勝曾無秩 破產張良不爲家 愁思夜來
應向月兩行清淚落 悲笳

秋夜王減庵綱庵顧伊人江位初同過荒廬

溪光日暮小山遮 忽聽蘆中笑語譁 載酒叩門驚吹犬 移船
縛柳亂棲鴉 坐銷紅燭添秋思 半側烏幃立露華 話到彥先
琴瑟冷 一時回首淚如麻 顧彥先八音琴瑟謂中庵也

確庵先生詩鈔卷之二

溪南草堂詩爲中州陳簡庵賦

草堂人住浣花溪 流水灣環遶舍西 亂後百年喬木在 春來
一路好鶯啼 牙籤舊拜先朝賜 白板新添野老題 日有閒愁
伴詩卷 數髭撚斷夕陽低

寒溪書屋歌爲盛聖傳賦

寒溪先生讀書處 近在城南芳草路 前有十畝之方塘 後有
精藍老僧住 老僧枯坐斷聲聞 時出鐘魚和白雲 先生定靜
略相似 其中微妙淵源分 吾道於今棄如土 碧瓦珠宮遍區
宇 同心蕭瑟三四人 嘆息無徒老環堵 憶昔相逢各少年 頭
髮鬢髮初及肩 掉鞅文壇鬪飛將 縱橫落筆揮雲煙 爾時浮
慕僅榮名 出門通顯作公卿 博得黃金大如斗 徒勞妻嫂羣
郊迎 繁華富貴艸頭露 毋乃還爲識者輕 幸從屢勉濂閩學

不負平生被儒服，驚湖促席討論勤。鹿洞攤書校雠樂，對牀
風雨一篝燈。五夜鷄聲常不覺，或如楊子說磴磴，或似朱雲
折嶽嶽。羨君凝思獨無語，千頃汪汪差可擬。三日不見黃徵
君鄙吝之心復萌矣。無端四海動干戈，斗米平林匝地多。惜
陰亦有投檣志，報國空成擊楫歌。最足傷心是甲申，銅駝荆
棘天地崩。白板江南誇扈從，丞相何人王茂弘。轉眼神州遂
沈陸，江頭野老吞聲哭。不見絃歌魯兩生，但聞馬上跋遮曲。
吾儕相對日慘悽，窟室全生生理亦足短。褐同爲編戶，氓虧體
辱身心不辱我家潭。上君寒溪我學耕，田君授書土銜蠶鹽。
聽夜雨沙堤花柳釣春魚，我亦時時乘野漲。襍被輕舸過溪
上，西鄰老圃不相識。曳杖門前頻一望，君能爲我具壺觴。傾
倒胸中積骯髒，擔簦抱籍走門生。爭坐春風如挾纊，若非繁
確庵先生詩鈔卷之二

三

露仲舒帷定是忠，經季長帳等閒一。任跳雙丸安問塵容與
俗狀，獨憐兩鬢已星星。木榻窮年註六經，窗外踏殘三徑雪。
案頭乾死一囊螢，人生失意恆八九。退谷愚泉古來有，先生
自號爲寒溪。此意得無相類否，蔚村七十二蓮潭。爲有頑民
潭亦頑，今古窮人盡如此。愁殺人閒水與山

諸季心新居落成

蔚村古桃源，儼然在人世。水木互明瑟，芟蒲相映蔽。中有蓮
花潭，傳聞七十二。居民百餘家，老農之所住。雞犬罕人聞，別
有一天地。季心何爲者，舍舊圖新計。不見斜塘濱，兵戈日來
去。烟火不得寧，童叟倉皇避。此中獨安堵，夜戶永無閉。以此
觀季心，允矣賢且智。善頌與善禱，冥機以卒歲。

臨安篇

歲乙酉詔封故少保兵部尚書于謙爲臨安伯遣官
祀之太僕陳濟生爲之使未及致命會國變而止後
九年太僕追傷還事形於夢寐因賦臨安篇以紀其
事遂屬珞和之

臨安東西三異人青田一出攀龍鱗智擒寧庶者誰子聲色
不動兵如神伯仲之間見廷益陰謀偉略無人及當其年少
尙諸生磊落骯髒有聲跡秉鉞恆嵩二十載鷺鷥謠語今猶
在也先入寇鐘虞驚闌入失策勞親征 英皇北狩 景皇
守社稷爲重君爲輕力阻南遷議甫定士氣人心乃重振十
二營開德勝門三千軍捷黃花鎮是謀非自當年始彷彿公
孫歸鄭主惟其不急上皇歸上皇之歸實以此一朝復辟奪
宮門日有青蠅移至尊碧血一腔洒無地奉天火裏來忠魂
確庵先生詩鈔卷之二

三

甲申之春陽九極 母后 君皇殉宗祏安得九原公再生
隻手扶輪固磐石國家多難追前功世爵恩綸下九重使星
銜命乘傳去荆棘銅駝道不通遙拜西陵淚如霰夢中靈爽
還依戀十載重登放鶴臺風沙馬矢吹人面讀君詩飲君酒
傷心不忍重回首廉頗李牧拊髀思數奇飛將能容否君不
見笳聲動地天子愁相國倉皇司馬羞采石江邊一片月年
年人哭靖南侯

和錢中野五十自壽詩

并序

士遇則視其所爲不遇則視其所不爲孟子禹稷顏
子之論詳矣然觀古之隱君子如文通彥方之徒或
脫巾解紛或分釜庾以救邑里之命而幼安之在海
表也講詩書陳俎豆置汲器并旁以待來者蓋分有

限而心無窮勢固不能以自己也蔚村今之桃花源也其中居民百餘戶以船爲家以魚爲食其俗敦龐而淳固以耕釣爲業子儻居者三年始以孝弟力田爲善三約約其村人又一年築岸塍修陂塘禦水患又一年行周急法濟飢者衆利賴之然非予一手一足之烈也黃君幼玉實相予而比年以來則有錢君中野中野舊家鳳里變革之後編茆於村之大濱躬耕自給暇則與黃髮小兒嬉而遊有不當意則寄情於酒量可容一二石雖極醉必呼其家人煖一大白就牀擁被一吸立盡始就寢所謂堯舜千鍾孔子百觚蓋其信也吾聞酒者天之美祿也其人非高人達士不足與飲酒果其人矣不遇窮愁抑鬱無所俚賴

確庵先生詩鈔

卷之二

三

之時與江潭烟水草木悲涼可歌可泣之地不足以見酒之妙而飲酒之樂千古之能飲而又適當其時與其地者柴桑一人耳然有男五人不好紙墨往往挂其懷抱今中野之子梅仙從予遊學聖人之道不苟試於有司而中野亦毫不以介意時時召酒徒飲醇酒醉輒仰天而歌歌已坦腹摩腰鼻息齟然酣卧於七十二潭之上斯其樂已極矣必如之何而後謂之得志哉今歲甲午中野年五十矣予讀其春日自遣之詩曰春鶯移樹弄春陽兩鬢新添半百霜鴛鴦日遲花影蹙草堂風細酒杯香身甘貧賤愁中樂老任迂疎分外狂天與閒人閒歲月小舸一葉汎滄浪其一種夷然自得落落然不可一世之狀有見乎辭

者予欲爲之進一觴而無以相侑也爰歌而和之
疎段殘秋漏初陽睡起茅簷薄有霜衝靄青山當戶立帶花
黃鳥過溪香陶潛止酒貧逾劇阮籍窮途老更狂願得江潭
同醉醒免令漁父笑滄浪

確庵先生詩鈔卷之二

詩

確庵先生詩鈔卷之三

玉山集 起乙未盡丙申

題陸翼王菊隱圖

短髮垂垂不整冠
陶家籬下獨盤桓
歌成白雪當秋暮
人對黃花共晚寒
亂後鄉關雙袖溼
夢回心事一燈殘
可憐名士推江左
祗許風流入畫看

黃攝六吉州生日詩四首 錄三首

昔日才名眾所推
一官正值亂離時
吳山楚水傷心畫
越鳥江花濺淚詩
陶令折腰終寄傲
胡公勵節豈求知
而今併入槐根夢
繡佛明燈照鬢絲

印溪江夏素風長
父女兒孫笑滿堂
人物傳中推叔度
晨昏

牀下拜文彊 令子公 遺家舊有書千卷
祭酒今堪望一鄉 使

確庵先生詩鈔卷之三

君推為時向平蕪少人處
小拖邛杖立殘陽

師友君臣吾道窮
雲天瓶水老僧同
綠窗那許獼猴入
一枕從教蠅蝶通
人定月殘香未冷
詩成花落雨初紅
燒芋夜到山中
客不是支公即遠公

簡凌約庵

漁唱前村醉綠莎
斜川風物近如何
板橋霜滑行吟緩
竹屋春深坐隱多
花出樹頭隨鳥墮
人經浦口卸帆過
遙知曲誤頻回首
未許周郎獨解歌

寄馮定遠

綠陰如幕透牆圍
小院春深晝掩扉
一樹啼鶯花自落
無人知是謝玄暉

和子晉贈鷗

零落芙蓉夕照微羽毛如雪點煙霏慣迓書舫隨風住閒逐
漁罾帶月歸避地祗知秋水樂忘機真與世情違無端乞食
人間去笑殺鷓鴣不耐飢

讀歸玄恭傳陸履常事有感兼弔子垂先生

一門風節與人殊先後淪亡歎恨俱絮酒尙虛徐孺子麥舟
可有范堯夫功臣斷碣今何在劉筠
廟碑義士遺書定已無心史
手跡
當代文章誰似汝好傳耆舊到吾吳

次韻陸彥修生日

虞夏神農事渺然路衢目斷醉人眠繩分漢位龍爭日鹿走
秦庭蠟動年攤飯一牀當午後灌花三徑趁秋前文姬未贖
明妃嫁獨守空閨覺汝賢

同湯公綸陸桴亭看楊林古桂

確庵先生詩鈔卷之三

二

天香十里若爲迎非是無材老半生綠葉動雲秋有色黃花
落地夜無聲雀穿曲幹和煙立人臥橫枝待月明勝事只今
能得幾笑沾村酒醉班荆

白壁

白壁誰云點點瑕青蠅多事枉相加曾參未免三投杼馬援
何曾載一車但得酒星明似月從它箕舌大于瓜封姨尙有
蛾眉妒落盡枝頭一夜花

贈王元倬追和中菴韻二首錄一首

何處堪巾花外車江南天地老蘆廬絕交論著陽狂日誓墓
文成痛哭餘萬事雲烟悲短髮十年風雨抱殘書明燈落木
蕭蕭夜詩卷言愁正起余

懷李映碧廷尉

一別雙丸去似梭涉江風物近如何
凹園蕪廢身名重書劍飄零著述多
落木怕聞蟲夜泣微霜愁見雁南過
遙知相國祠堂裏祭告纏綿痛兩河

次韻得閒廬詩

矮屋雲深綠水灣露華披竹老成斑
門開柳色春風裏人在梅花夜月閒
高適有年吟興發向平無累道心閒
全生養拙于戈際未許移文笑北山

霜葉

晴光散秋暮天地嗒然真樹老將至
山山紅又新有聲宜獨夜不定似羈人
莫歎成搖落含風別是春

村居卽事

颯沓涼飈萬葉飛蘆花如雪照柴扉
七歌欲絕腸應斷百鍊確庵先生詩鈔
卷之三

三

將成事已非南浦犬聲漁網集西山
鴉背夕陽微沿村一棹伊亞急應是
兒郎得酒歸

香雪藏詩

吾友王子春別號石隱通于文字之學
著六書論正其說出漢唐諸家之上
近預爲生壙旁種梅花百株

謂之香雪藏作詩自述因次其韻贈二首
錄一首

秦斯周籀等閉身叔重遺文又一新
雙鬢半因傷亂白十年都爲著書貧
詩成石壙高人趣香滿孤山處士春
生便埋名死埋骨乾坤何處不風塵

馬鞍山百里樓晚眺

傑閣起悲風憑闌思不窮一城秋水際
萬木夕陽中兵氣連滄海人煙混太空
感時徒作賦王粲豈英雄

靈岩槩菴和尚故黃門魚山先生也崇禎末直聲震天下今逃于禪杖錫至玉峰子拜而見之因成四詩奉贈已無姓氏掛人竄尚有聲名重泰山萬里一身餘涕淚十年雙屨老閒關龍腥怪雨江城黑鴉背殘陽木葉斑爲問天涯幾知已可能留得舊殷頑

曾爲修竹上彈文又見寒松倚暮雲故國山河愁裏夢異鄉

鴻雁定中聞令威未化遼東魄伯樂能空冀北羣我亦欲從

飛錫去紙錢杯酒酌韓墳

斬王墓在靈岩山址

圓顛方袖朔風寒乞食人間下戒壇儘許營齋來上座誰云

饒舌怪豐干乾坤有意爲芻狗日月無心似跳丸莫把離騷

付江水還留楚調與人看

索公新詩故云

硯石山頭古井空吳王曾作館娃宮銀牀素綆銷沉久青草

確庵先生詩鈔卷之三

四

垂楊感慨同法鼓三千存禮樂輪珠百八老英雄攢眉休笑

陶元亮止酒何妨對遠公

丙申元旦步大人韻同遜邀兩兒

條風扇暖斗初旋消息紅梅取次傳菽水笑添鳩杖酒桑麻

判老鹿門田迎神社廟來村鼓罷釣漁舟繫野煙聊寫陶詩

掛蓬戶不爭艷冶入新年

春帖貧居依菴稿臥起弄琴書又我賣幽居士聊爲隴畝民

立春日同梅仙歸村舟中次梅仙韻

寒沙雙岸白冰雪掩殘苔乍霧山先見初春鳥未來竹爐沾

酒醉漁艇載書回小犬眠花影柴扉叩始開

家大人遜邀同和見別集

大雲堂

面岡背竹曲池環之清風爽氣日夕自佳

曲巷埋名迴虛堂日夕開簾疎花氣入榻靜鳥聲來客有青
雲士家多白雪才坐深忘漏永零露下莓苔

唐亭

形如土室穴其四旁梅花掩映雪月皆宜

愛此唐亭僻梅花靜倚門無人如太古有月共黃昏山凸生
雲竇溪平露雪痕于時何事樂一卷對清尊

小有居

土岡而南別有天地長林叢薄中朱欄畫棟入者
疑爲仙居

忘情思草木細與橐駝謀移竹宜乘雨鋤蘭不待秋名花分
上苑異種自仙洲蔗境吾生足浮名水上漚

據梧軒

確庵先生詩鈔

卷之三

五

小樓數楹下臨曲渚柳風拂拂畫槳時來檻外桂
花鬱然葱蒨致足樂也

小樓幽眇獨片片落霞飛入夜琴絲潤先秋桂馥微百蟲依
火亂一鶴向人歸忽見階前月光華上板扉

震笠

土岡小而高夾以深池復側一山相望成勢松濤
春然四下南岡著小亭如笠可以箕踞中秋待月
此地最勝

攜筇亦可入何必整車巾松籟時時雨花香日日春楊亭多
載酒蔣徑少行人卜晝常兼夜風光幾度新

綠天徑

竹有萬竿蟠窟三畝高下其徑入者如步山蹊

未必分蕉影依然共綠天引颺涼小徑漏月照斜川外直看
誰似中通覺汝賢苦吟正相倚淒絕一聲蟬

越閣

遠寺吐朱閣春潮浮綠烟願逋翁得意語也閣外
似之

閣外幽芳合隨時樂不窮葡萄綠架綠枸杞上牆紅鏡柄浮
生托奚囊快友同閒來喜覓句得意似逋翁

煙鬢榭

去綠天逕數武環以高岡止水一泓深碧可鑒泉
聲屈注不絕白泉自號謂此也

源頭有活水積勢小成湍玉碎流荒樹珠明濺淺灘亂雲生
曉樹層雨罨秋巒三寫焉烏誤攤書仔細看

確庵先生詩鈔卷之三

六

濠上

城內諸河盡淤獨園東一帶水從新洋江來曲折
清深磊石爲灘望薦嚴寺無一牛鳴也晨鐘夕梵
與牧唱樵歌相和擁竿其上可以適志

柴桑喜高尙地以此心偏漁集煙中網僧歸雨後天鶯聲春
駘蕩花信日周還兒戲真如蟻槐根夢又圓

舒嘯

千章古木間以老松曲江云天清風雨聞差盡其
勝此鄰墓物以亭目之如爲己有

置身當百尺東望女牆低樹杪穿孤塔溪腰俯一犁野樵愁
獵騎村犬吠征輦無恙春風柳關關兩個鷗

映碧先生見遺地圖仍用前奉懷韻

圖畫山川感慨多邊陲風景近如何入關無復蕭丞相聚米
空思馬伏波兩戒一江橫似線九州五嶽小於螺錯疑留守
魂歸夜風雨聲聲喚渡河

春家皇立齋遇顧茂倫吳赤溟沈雲樵徐松之施又玉
瞻拜 先帝王遺像已而皇士出袁介人送家孝則詩
暨茂倫又玉和作漫賦一章紀事并示介人孝則

葑門橋頭春水曲葑門道上晴煙綠兄弟相思歲月深一朝
相遇驚相矚斗酒金尊話正長疎簾日影移清光插架圖書
照毫髮印須吾友來登堂登堂傾蓋吐肝膈跡寄緇塵心白
石茶竈書牀夜雨舟蓴羹膾秋風客吾儕不必恨長貧投
老天涯學避秦誠兆食人當甲子運逢薄命降庚寅世情翻
覆如蒼狗得喪窮通無不有天寶餘生我尙存永嘉流禍君
確庵先生詩鈔 卷之三 七

知否誰將朋黨誤朝廷誰爲身家欺我后誰使干戈滿地生
北都煨燼南都走龍起空聞三百年土崩瓦解言之醜嗚呼
志士多苦辛丹青一卷傳真人真人颯颯悲風壯前列王侯
後將相隆準重瞳氣象殊豹頭燕頤精靈王采石磯頭奪槊
容鄙陽湖畔張弓狀拜舞瞻依喜不勝泪痕早溼青衫上西
田日暮各歸家袖出新詩尺幅斜自是河梁離別曲珠爲咳
唾筆爲花九峰峩峩三柳急不歌乘車歌戴笠調高和者較
偏多堪嗣玉山草堂集何時載枉峭帆輕同岸紗帽望月明
石鼎聯成彌道士江關吟遍謝宣城

江上拜江國海國二吳公祠

百戰君兄弟孤城重帝京到今江上水猶作寶刀聲

弔戚舍人宅

文華殿中書舍人戚勛號羽明乙酉城陷自書年月
姓名于壁闔門焚死妻侯氏妾程氏葉氏梁氏女三
姐八姐九姐皆從焉計死者二十一人堂列男女兩
棺蓋燼中餘骨也余偕潛在梅仙拜而哭之
白骨埋青草全家烈焰餘夜來牆上月光照數行書
過黃博士故園

黃毓祺字介子己丑歲庾死金陵獄中著遊仙詩一
卷今其故居已爲僧舍改名萬佛林矣

讀君遊仙詩一泪成一字可憐義士居竟作浮圖寺

拜季子墓次壁間張正見韻

季子空祠廟風流自不移山如相讓色樹老獨醒枝

旁有奇樹能醒

人地脉迴申浦天心愛孔碑

雷震字字碑不壞

班荆齊酌酒此意許

確庵先生詩鈔卷之三

八

誰知

甲之水三章題季子廟倣王元吉體

有序

丙申孟夏偕潛在梅仙泊舟芙蓉城外每遇風日晴
美則登君山瞰長江歷覽鵝鼻嘴大小石灣諸勝過
劉伶巷上杜康橋訪伯甯荒塚于城濠凡吳氏二侯
祠戚舍人黃博士廢宅無不歌呼而憑弔焉已復求
季子墓而往拜之攷國初王逢嘗賦申之水詩以題
其廟其序曰廟在申港大阜上去阜二十餘步有田
二畝名池子區相傳呂舍人花園也呂氏宋末官閣
門舍人方治園時夜夢神告曰吾季子也汝將鑿池
處吾實葬焉呂鑿池及土深果見巨首圍五尺許始
驚焉函移瘞今廟後至正戊子歲子躬謁廟下爲賦

三章用追弔云詩具存梧溪集中潛在簡示子屬子
倣其體同賦其事

申之水何湯湯登君子墓爰薦馨香嗚呼讓國同子臧太伯
虞仲遙相望十字碑題照千古胡爲宋儒輕訾量君不見龍
行虎步作天子廷美德昭不得死

申之水何湜湜登君子墓爰薦黍稷嗚呼四月十二日

季子生日

男婦如雲走如織此豈浮圖老子宮神所憑依將在德君不
見梁公淫祠毀無數廟貌巋然永如故

申之水何源源登君子墓爰薦蘋蘩嗚呼呂氏空治園葬欲
速朽前人言一坏黃土二千載豈有巨首仍軒軒君不見漢
寢唐陵骨不保孤臣涕泣冬青道

子晉重建破山寺空心亭卽用常建詩邀同社分賦四
確庵先生詩鈔卷之三

九

十首樹碑亭左得晨字

會依潭影宿疎磬報清晨叙靜龍身蟄僧閒虎跡親高林仍
照日曲徑尙通人興廢增悲感題碑又一新

皇士前五圖詠

皇士太僕敘其生平往跡分繪五圖范質公黃石齋
楊機部諸公江上講易一伏闕請文莊卹典二謁天
壽陵拾松子歸成樹三視馬滌陽四乙酉奉使晉于
少保臨安伯爵五一時多賦詩以紀其事者余因作

絕句五首

回首江頭受易年已騎箕尾笑歸天藥牆倘許重相見定授
潛龍第一篇

萬戶千門響玉珂小臣曾此乞恩波御溝流水依然在半作

他家飲馬河

天壽峰高 十二陵幾多狐兔照漁燈凍雲北望愁千疊欲
哭冬青恨未能

青絲玉勒踏春風淅上山川好句中明眼似君今伯樂管教
一過馬羣空

白晷兼鬚奉使臣關山戎馬淚沾巾只今風雨殘燈夜尙有
靈旗入夢頻

皇士後五圖詠

太僕又作後五圖坐禪一高卧二擁妓三觀瀑布四
指揮軍政五大僕雅量高致概見于此余亦作五絕
句題之

春鳥空啼曉樹聲花開花落不關情閒中只有興亡感坐破
確庵先生詩鈔卷之三

十

蒲團銷不成

多難乾坤一腐儒十年風雨臥江湖希夷高枕吾家法可有
華胥到夢無

何許蕭郎白鼻騮風流春色惱人家曾聞閭闔尋春日不見
如花祗見花

聞皇士曾納姬不遇以
重價買茉莉歸故戲之

翠嶂遙從天外開飛泉百道下如雷何當化作中山酒一鼓
鯨吞萬萬杯

百萬貔貅指顧分他年樹下識將軍誰知葢代文章手露布
磨厓總是君

和皇士揜鬪詩

爲食枯坐好盡日揜雲亭銷暑看雙劍忘年注六經榆陰遮
戶綠螢火入簾青冉冉流光去殘花下一庭

秋夜懷家鶴客時有許以陰事者

久知肥遯作冥鴻何事人傳觸網籠中散有詩傷薄命步兵
無淚向途窮亂離萬事成蒼狗慷慨孤心感白虹秋夜懷君
頻坐起小窗風雨一燈紅

訪無寓上人

小通畧約處峭舊裏禪關溪冷泉初引畦深草未刪蟲鳴花
外雨人立樹頭山別去誰為侶涼颺月一灣

金鶴翀侍御死節詩

驄馬埋輪烈丈夫會將諫草伏廷蒲黨人碑下劉逵奏疏救復社
安上門前鄭俠圖疏陳荒政一劍更難君父後保定城守時全家

無媿聖賢徒閩門死節挑燈細讀徵君傳尚有程嬰抱兩孤公姪肖孫

匿公二子

確庵先生詩鈔卷之三

十一

大雲堂卽席次九來韻贈家藹公

瑟瑟涼風墜葉鳴天涯尊酒坐班荆蹉跎風雨存吾道離亂
山川仗友生一曲羽聲來易水中宵劍氣出豐城玉峰高會
予偏晚慙媿風流顧阿瑛

病肺

病肺秋風吹一廬鬢毛冉冉白何如函關枉著王符論報國
空存葛亮書土銜荒寒鳴竈馬茆牀卑濕走衣魚長庚夜夜
光如月萬事頽然一醉餘

送翼王歸嚮

梅花燈火對深宵門外西風利似刀今夜角聲催舞劍來朝
木葉送歸燒幼安遼海人依舊泉羽西臺怨未銷同是天涯
離亂客幾回腸斷練祁湖

丁酉春暮送江愚庵燕遊二首

鳥啼春盡水悠悠，撲岸楊花送客舟。不奈別離宜醉酒，曾經戰莫登樓。夢來尙作劉琨舞，秋到還同宋玉愁。一望中原思無限，廿年全盛此神州。

燈火連宵舊日情，當時天下尙承平。書成木榻花初落，劒舞茆檐月正明。已屬古歡難再得，不堪人事日紛更。憐君雙袖辭妻子，千里迢迢作遠行。

送王懌民之燕

薄霧輕煙逗午和，送君南浦意如何。玄融師弟圖書樂，愚菴同行僑札賓朋編紵多。故國夕陽帆外見，帝城春樹馬頭過。刀環定誤深閨約，莫聽高樓子夜歌。

確庵先生詩鈔卷之三

三

吳玄咫兩謝徵書賦贈

蒼蒼松月下，東臯空負邱園責。帛勞馬隊校書卑，祖謝芝山高枕失蕭曹。狂能中酒三年醉，老愈工詩一世豪。非是煙霞成痼癖，漢家宮闕久蓬蒿。

送王登善謁選

碧溪一路聽啼鶯，無限春風在此行。救世定存三代志，窮經休負十年情。風流人傑推王猛，文獻中原屬許衡。慙媿故人空老大，祇將飢餓荅平生。

閉關詩

丁酉春三月坐虹友齋頭，雙扉深鎖闕無車馬之跡。吟詩讀書怡然自樂，古人所謂郭郭之中，曠若郊墅者也。爰書別有天地四字粘諸壁間，因成一律寄興。

橫木爲關當邵窩天根月窟此中過空庭夜雨添青草瘦石
春風長綠蘿吟罷不知花片落靜來還畏鳥聲多時時有夢
歸潭上釣艇烟深背一蓑

簡歸玄恭

淮陰陳確巷白門顧麀士珷玦混良玉渭水濁涇水耳食與
目論人情每如此近聞大江南亦有兩歸子一歸性簡傲臣
朔飢欲死一歸袖圖書醉飽崇川市我還問歸子歸子果誰
氏

簡黃攝六

鬢絲初白佛燈紅回首當年事事空花落花開三月裏人歌
人哭十年中宅邊綠柳思陶令洞裏丹砂問葛翁時攝六學
長生術
又見榆烟近寒食健兒驅馬鬪春風

確庵先生詩鈔卷之三

三

李灌溪侍御家定齋太僕百齡合壽詩

同是孤臣旋白頭江東人物舊風流楷模天下思元禮文範
吾家重太邱後甲先庚齊得戊灌溪戊戌
定齋戊午一時偕隱足千秋
他年好記遺民傳瓜落青門兩故侯

重陽後一日含綠堂吟社初集袁重其索賦

黃花絳葉送重陽冰雪文人聚一堂有國共牽庾信恨無冠
誰笑孟嘉狂老知節物驚心易愁覺烽烟入夢長稍喜詩門
袁孝子年年雙鯉乞詩忙

和袁海叟白燕三首

昭陽宮闕是耶非盼盼樓臺夢已稀玉樹但聞花外語晶簾
難見月中歸藐姑冰雪疑爲骨京雒風塵未化衣今日畫堂
誰舊主肯從簷下傍人飛

零落香泥故壘非
玳梁珠箔遇應稀
獨留潔白遲春至
爲愛空明入夜歸
掠去不知花似雪
舞來還借月爲衣
自憐未是尋常色
頻向青山覩處飛

墮簷如雪又成非
一水空濛鑿影稀
圖畫定依梨樹立
夢魂長遶玉釵歸
蘇卿塞外還家鬢
陶令門前送酒衣
訴盡興亡無限恨
春來秋去故飛飛

和陶三首

形贈影

相須雖最殷
相遇有疎時
賢哉君子我
日夕同所之
膠漆與水乳
綢繆不如茲
少小遂投分
投身以爲期
因依四十載
遙使人思君
應共我老撫
運興悲涌我
髮似崔嵬君
亦不吾疑
顧壁各相笑
嗒然無一辭

確庵先生詩鈔卷之三

古

影荅形

世人皆愛巧
惟君獨守拙
我拙亦如君
邈與時好絕
但知審邪正
豈能辨容悅
蕭蕭風雨夜
疑若暫乖別
青藜一以然
我跡仍不滅
君賤我不寒
君貴我不熱
君本凌霄姿
有願終當竭
我其從君游
方軌無優劣

神釋

三才人最靈
厥義古今著
譬猶鑑照物
實以光明故
自從有生來
與君相麗附
我爲渡君舟
曾聞真誥語
又聞車從馬車
敗馬何處君
行由我行我
住非君住要
有立命術
騰化何足數
交黎與火棗
只在此中具
夷齊雖餓死
不朽千秋譽
鼎鼎百年中
有時別君去
得固不足忻
失亦不足懼
反躬良共背
動靜兩無慮

高彙旃提學于墓旁築石屋有詩記事奉和二首

鑿屋空山傍故邱等閒心事係千秋
鳴泉暗寫孤臣恨落日平添孝子愁
萬木雲邊見高鳥五湖天際辨漁舟
無窮事業歸書卷玄晏先生未白頭

世事今如折足鐙誰爲吾道作干城
一祠早拜揚中立五嶽還從向子平
絕壁翠遮黃犬吠亂霞紅照碧泉明
我來策杖尋蹊入只向漁人問落英

掛山樓月夜觀荷有序

丁酉季夏東郊池荷盛開白公舉香山之會王子續
蘭亭之遊于是載酒掛山樓中招集同社賞花賦詩
斯時薰風南動圓耀西沈青山白月交輝螢火禪燈
相亂洒具聖人之德花開君子之香遂乃分硯劈牋

確庵先生詩鈔卷之三

五

各伸雅志燭痕滅而金玉鳴鉢響流而珠璣落筆不
停綴文不加點以今揆昔殆有同情諸兄皆人之表
儀國之俊傑涉斗牛之分野山川助其壯懷更陵谷
之屢遷今古資其憑弔固宜登高能賦觸物成吟而
使君以政事之餘旁通風雅心閒手敏落筆驚人康
樂出守海郡池上有登樓之篇知章屏居鑑湖中流
有采蓮之曲豈非天挺之姿秀出人區者哉予以負
疴兼旬辭不獲命勉應賢主之招妄廁良宵之席披
靈均之芰製岸襲美之紗帽叔夜之迂狂自如淵明
之謬誤可恕顧不自揣量輒以糠粃先導已而復成
投贈四首并諸名篇彙而錄之都爲一卷將攜歸蔚
村誇于田夫樵叟之前亦以見太守之風流爲一時

之勝事云爾

圓碧輕紅漾一池樓臺倒影見參差
杯湖人重非干進金谷才高各有詩
山勢忽移知月近花香齊動覺風吹
使君心地清如水野鷺沙鷗定不疑

卽席贈白使君

訟堂無事使君來對酒看花鬪麗才
月帶艷光搖竹樹風飄香氣入樓臺
綠溪畫舫雙鳧近隔岫禪燈一磬催
幾度揖山不語倚闌凝思獨徘徊

贈主人王周臣端士異公

猶是當年綠野堂湘簾半捲藕花香
青絲繫艇人如玉絳蠟籠紗筆滿牀
客醉已成王粲賦主歡重進孔融觴
脫冠露頂車茵污定笑狂夫老更狂

確庵先生詩鈔卷之三

夫

又贈

清光斜映一枝枝無限含情祇自知
騷客薄醒秋思後美人初浴晚妝時
圓珠的的迎風碎墜粉娟娟帶露垂
七十二潭吾舍在亂紅零落繫人思

通暉樓詩爲松陵沈建芳作

危樓百尺五湖東亂後天涯極目同
宛馬曉嘶芳草路杜鵑春恨落花風
有無人物菰蘆裏多少山川鼓角中
解道仲宣工作賦愁來閒凭夕陽紅

丙園精舍與天御園棋

風入疎篁午磬遲翠恩紅漏晷潛移
山僧削得瓜如雪坐樹閒敲一局棋

繭園夜坐卽席和白泉先生

小山秋更好團坐一亭陰階下聽流水堂中橫素琴微雲生
戶牖涼月動衣襟何處天香發無言此夜心

同虹友遜兒夜話用放翁初冬韻

疎幕迴飈動月光皎於白日冷於霜蕉吹敗葉頻疑雨菊倚
寒枝尙抱香愁聽亂離烽火逼細論人物酒杯長桐江釣客
吳門尉不遇真人髮已黃

壽師母趙太夫人追念業師我完先生

有序

吾師我完先生以文章學問名滿海內海內望之如
山之有嶽水之有海莫不擔簦抱簞走千里而幣見
以得與門牆爲幸也瑚年未弱冠卽偕江君士彥陸
君世儀王君揆撰同受經于先生之門時先生家食
貧又兩尊人在堂旦暮饗殮常不繼吾師母太孺人

確庵先生詩鈔卷之三

七

時出其泔泔織絰之資以佐之歲已卯先生登賢書
然布衣疏食如故太孺人安之無纖毫非分之望也
先生性亢爽鄉黨間或有不平則義形于色挺身而
鬪一切米鹽瑣碎非其所屑故常遠游江北不問生
產數十年間先生得讀書勵行寬家室之憂者太孺
人內助之力居多酉戌之交先生避于嚠邑之槎溪
瑚與天御託跡任陽先生徒步造訪彈碁賦詩流連
三日夜始別去其于行也諄諄欲求一結鄰之地如
潯陽三隱故事亡何遂及于難而怱怱憂愁抑鬱以
歿今歲丁酉太孺人年六十屈指計之已相去十餘
年矣向使先生之志得遂而望衡對宇杖履無恙今
日者度阡越陌修隻鷄斗酒之歡豈不大樂今乃不

見先生而僅得壽吾太孺人其爲可感也已于是乎
系之以詩

登壇獨立是人豪盡道龍門聲價高橋外衣冠聽盛閣中
燈火校讐勞亂來踪跡思梅福老去文章續謝翱今日升堂
拜吾母草深門巷雨蕭騷

戊戌春贈姚鑑三生還

自古誰無死生還亦偶然窮愁與我共蒙難感君偏木以霜
逾老金知鍊更堅天心今夜月如爲故人圓

春盡日病中自遣

昏昏如醉復如疑藥裹書籤強自支但有暮愁微雨後更無
春夢落花時學仙爭得長源骨客有勸子驅鬼空吟子美詩

九十風光容易別祇添雙鬢白於絲

確庵先生詩鈔卷之三

六

次韻白林九明府東郊芍藥

紅影翻階香滿枝含情無限信風吹偏迎晴日生搖蕩不與
春光管別離名亞花王猶有恨人疑仙窟可無詩停杯早見
鉤簾句太守風流話一時

客秋與家定齋有洞庭之約而以病不能往讀其遊記

歷歷如在目中今歲四月遇定齋于玉峰同過婁江連

宵對榻忽又別去予尼之不得云將歸而閉關銷夏成

吳中文獻一書其好學如此子乃書閉關學道穿榻讀

書八大字并成長句一首以壯其行因邀同人共作

天涯兄弟對牀艱忽漫逢君綠水灣豪氣未除書卷在高冠
無恙酒杯閒到來謝屐方乘興歸去揚亭又閉關後會相期
何處所五湖煙月洞庭山

重午寄餘亭夜集留別林九

綠楊村舍閉高眠，忽訝招尋尺素傳。
自愧人非陶處士，可能文似杜樊川。
入來雲影搖溪月，坐處花香過竹煙。
記得鷓鴣詩句好，公堂瀟洒有林泉。

贈四明虞生餘

客裏相逢庾子山，暮年聲譽擅詞壇。
奇書禹穴燃松探，古碣娥江立馬看。
賓榻高眠花自落，墨池飽蘸酒初闌。
主人爲吏清於水，日餉官廚一片肝。

虞山道中見插秧

千家村落雨蕭蕭，纔送泥牛急稅徭。
境有城狐爭避虎，野無田鼠罷迎貓。
鬼妻向夜登牀泣，獵火驚人動地燒。
天若解憐貧戶口，來朝根莠盡成苗。

確庵先生詩鈔

卷之三

七

口號和有仲

花落春殘細雨時，和愁和恨一枝枝。
分明記得宵來夢，只合東風燕子知。

虞美人花和有仲

春風搖搖春雨吹，紅紅白白紛參差。
白如楚殿凝粧日，紅似烏江濺血時。
江東景色有何好，香魂化作江東草。
應憐子弟八千人，從軍一旦爲灰塵。
爲君歌舞爲君死，千古有心誰似汝。
拔山蓋世信英雄，當日英雄安在矣。
低頭聞花花淚垂，欲言不言長相思。
君不見明妃墓上寒煙碧，至今青草無顏色。

竇伯以農事歸寄示一首

竭盡書生力，躬耕二畝田。
麥愁庭潦沒，糠作杖藜燃。
計拙全吾道，時危覺汝賢。
誰知鷓鴣畔，一笠破溪煙。

和有仲十蟲詩

米蟲

只因玉粒愛纖纖不惜將身葬釜鬻百萬倉箱誰禁汝柴桑
飢殺有陶潛

蛙

池塘鴨綠漲如天鼓吹煩君伴不眠今日梨園坐何部料應
博得水衡錢

蝨

北向禪居易若何蝨行腹中應道赤心多吮人膏血纔三日
便與同儕作太婆諺語三日北何過蝨太婆

蚊

當空圓矚靜無聲入夜薨薨到五更總有鋒芒能刺骨祇教
確庵先生詩鈔卷之三

成得露筋名

壁蟻

雕甍頽屋等無分斷盡聲聞卧白雲今日山僧誰靜坐九年
面壁不如君

蠹魚

謾道香芸辟惡方殘編零落不成章逢渠卽是詩書劫何必
人間有始皇

蜘蛛

檐牙屋角置身遙機巧渾如壘斷招一網可憐空打盡持竿
童子不曾饒

蟬

偏與炎歊六月宜綠楊攀附最高枝一鳴自覺驚人甚忘却

泥丸轉糞時

紅蜻蜓

緋服朱幡結隊新曾從龍窟學潛身不知可有真龍否耀日屯雲祇誤人

螢

晝偏伏處夜偏紅也有微光點碧空不是幸逢隋煬帝爭教陪從景華宮

以插秧詩示潛在潛在連和四章備極其妙因疊前韻代述農家之樂然亦如天寶宮人談開元舊事矣

鶴儀鳩杖髮蕭蕭共話昇平減稅徭曲曲池塘晴門鴨離離花影晝眠猶紅鱗味美開窗釣紫芋香生就地燒春社始過秋社近懷新門外見良苗

確庵先生詩鈔

卷之三

三

雨後同潛在梅仙師周論詩池上

雨和花共墮蹴處欲成蹊翠愛藤蘿合香知菡萏齊山晴何處鳥村午一聲鷄共啜敬亭茗論文日未西

寄饒隱菴勝公

月落空江夢所思清風祇許鷺鷗知花邊餘課兼鋤藥畫裏禪機更得詩翠竹有聲涼雨後青山無恙晚霞時珠林亦是炎涼路誰走荒郊拜勝師

梅村學士生日詩四首

天下文章今在茲杜詩韓筆是吾師談長萬大千言外衰起諸家八代時隸草通神花共落丹青得意鶴先知風流已合人人醉曲誤能看更阿誰

五十荀卿又見茲故應再作瞽宗師高僧鄧尉求銘日都講

長安獻賦時花下麗詞妃子笑座間新句雪兒知清朝若要脩唐史眼底廬陵試問誰

竹箭東南總聚茲侯芭應得問奇師驪龍尚記探珠日金馬方逢避世時夜露含情隋柳見春花感泪蜀鵑知中原天爲

留文獻耆舊于今定屬誰

玉馬金貂肯戀茲鑑湖投老是心師差排絳帳春風裏管領

青山夜月時玄晏序成天下重子山詩在後人知雞林海外

傳名姓不問梅村又問誰

端士謁選北行次煙客先生韻送別四首 錄二首

三千客路一孤篷愁聽江流只向東鼓發五更何處月笛吹

今夜故人風酒尊欲盡青山合漁火初明碧水空添得別離

多少恨戍笳城角亂雲中

確庵先生詩鈔卷之三 三

人心長恨有波瀾世事於今眼倦看張祜悔歌年少樂鮑溶

重唱路行難鎖卸利向盤根見驟駢才因遠道殫莫但瞻雲

頻洒淚好將助業當承歡

弔淮南李平子

大雅風微賴有君關山秋月思氛氲誰知一夢歸流水却送

孤心入斷雲江上落花春已去天邊哀雁暮偏聞簡君遺墨

無窮恨小札殷勤細論文

遲李映碧先生渡江不至

美人渺渺隔江流有約相過肯放舟皓月乍傳千里思碧雲

先散一天愁仙帆只想迎元禮玉軸誰知戀鄴侯何日西窗

聽夜雨一編心史續陽秋

懷義興邱文眉

誰更交情似汝真亂離愁殺四方身跡同王粲家安在貌類
方千命不辰雲散風流何處雨鳥啼花落幾回春衡門柳色
依然綠不見相思命駕人

題秋孫近詩二首

檀園曾是浣花堂剩有風流奕葉香人遇二珠驚解珮月明
一乘照催妝俗憐消渴貧司馬愁愛多情瘦沈郎比欲爲君
傳獨行轉令人廢蓼莪章

秋孫近爲招魂葬親
重守心喪斷腥止酒

面山背水一茅堂中有詩人花草香水帶雒妃離合意山分
西子淡濃妝已就微尙歸盤谷應寄愁心到夜郎賦就銀河
誇織女几回機杼不成章

題王太常爲馬退山畫扇

亂山生處萬山開短屋疎籬樹色迴曾累高人黃子久片帆
確庵先生詩鈔卷之三

三五

煙雨尙湖來

王研存進士生日詩

曲江春色照衣裾鼙鼓漁陽動地初皂帽便爲千古計青門
已卧十年餘

研存釋褐不受
官卽歸故里

漢家避世無金馬唐寢傷心有

玉魚不是適逢閒歲月誰容玄晏老耽書

王周臣中翰生日詩四首錄一首

東髮論文覺汝賢才如風發思如泉誰知書著窮愁日已是
人當強仕年規矩高曾思舊德墳簾兄弟見新篇烽煙不用
頻搔首綈几焚香卽地仙

和虹友懷漢槎次漢槎獄中元韻

秋風鳴鳩化啼鳩逝水雙丸送白頭曾記去年花裏別豈知
今日籠中囚麒麟出易終非瑞鸚鵡才高正得愁最是唐家

知愛士一官猶許慰荒邱

偶成

纔見開花又落花月初東上日西斜人心到底如書版印盡
千差與萬差

患眼

看花却似霧中行對酒還嫌絳蠟明桐葉一庭書萬卷只將
詩句和秋聲

秋日獻煙客先生

花護書巢草覆庭牆東人坐一簾青魚牋硯落新裁句虎觀
家傳舊賜經十資定承天上誥四休初記谷中亭只今便是
高陽里更有何門聚德星

疊前韻和煙客先生西田詩四首

確庵先生詩鈔卷之三

壽

一片秋光落戶庭隔煙遙見數峰青溪頭人語蟬聲亂雨後
苔痕烏篆經紅愛晚香荷豔豔翠看高竹節亭亭瑤池若降
西王母定指人間有歲星

稻花香氣入空庭雨過平疇分外青二仲到時桑落酒八關
齋日貝多經芙蓉綽約王維汧楊柳揆疎白傅亭遙想披襟
深坐處夜涼人定一池星

雲影溪光共一庭梧桐初下薜蘿青添成高士求魚具註就
仙人相鶴經自有丹青題謝障誰云玄白笑楊亭比來學化
莊周螭栩栩何愁兩鬢星

雙扉習靜閉秋庭佛火長懸照帝青菊品新添先入譜茶香
罷鬪已成經夢魂想到慈恩院名姓應垂麗句亭邊報差除
多不管無煩術士問三星

再訪李研齋太史不遇留贈

去住如鷗又十年故山萬里隔風煙
當筵尙憶郗筒酒得句還書蜀錦箋
研齋蜀人侍從昔爲天上客隱淪今作市中仙
兒籃蕭寺重相訪門掩花深思惘然

寄懷殷元修

風塵回首恨難裁此日江南庾信哀
衰鳳只成車下誚卧龍空老隴中才
煙和草色經秋冷雨送蟬聲入暮來
一水盈盈勞佇立短筇吟遍釣魚臺

秋日寄題秦叔香馨館

遙知芸閣畔萬卷一匡牀
山色分秋雨湖光動夕陽
風詩歸大雅燈火及新涼
解得香馨意無言桂子香

寄懷登善

確庵先生詩鈔卷之三

蓋

匹馬燕山兩度秋朝衣誰與護香篝
看花不入劉郎觀愛月偏登謝眺樓
宣室席逢中夜召春陵詩爲一隅憂
故人豪氣空湖海野水茫茫照白頭

寄懷吳茂長

故人家住練祁東雙鯉頻將尺素通
幾欲放舟尋夜月可堪高枕怯秋風
里符征賦村村急獵火燒天日日紅
回首揚州成一夢謝山蕭瑟庾樓空
茂長故在史閣部幕中

夜聽吳飲和彈琴

銀漢迢迢北斗橫九華入夢不勝情
用袁具外彈琴事秋山松嶺含風細
寒澗泉流挾雨清能使四筵如靜女
似從六代見咸諷曲終定笑湘靈瑟
空向人間寫不平

哭江俊求四首

生死交情泪萬行寢門一哭路人狂風流已失周公瑾憂思
能傷盛孝章花似爲君春寂寂月如無主夜茫茫男婚女嫁
猶餘事白髮衰親歎北堂

延英開社麗如雲珠樹堂中張一軍尊甫鹿吾先生於珠樹堂結延英文社夢

去五花生綵筆迎來一笑出紅裙羽觴向月深深醉檀板臨

風緩緩聞今日哭君思不得重重哀感淚紛紛

君家舊宅久蕭蕭還傍虹飛南市橋春去梁間無語燕秋來

池上有鳴蜩壞牆薜沒行人路老檜煙寒故國條最是多情

惟草木年年紅淚落芭蕉

亂餘踪跡寄江村廢盡田園十畝存稚子習畊晨荷耒里胥

催賦夜過門遺家止有殘書篋盛酒兼無老瓦盆地下可知

長不瞑哀哀孤寡怨黃昏

確庵先生詩鈔卷之三

二泉書院落成詩寄桴亭

三

萬樹松煙萬壑聲空山書院落初成千年俎豆尊先進一代

人文律後生王佐只今誰董仲經明當世少匡衡故人高枕

荒江畔涼月秋風無限情

吳錦雯司李新任吾郡承其枉駕不能走答賦贈六首

錄三首

片帆風送闔閭城翠蓋朱轡候騎迎已有才名推國士豈無

經術爲蒼生刀能切玉操時見瑟欲調弦解後更吏治近來

多粉飾吳儂矯首望澄清

十分財賦五東南約略姑蘇郡又三胥爲催科多害馬農因

剝肉誤春蠶不知他邑誰稱母却喜吾州獨字男科得下車

先問俗早將朱墨記廉貪

聲華會動越王臺教化今應取次開橋外衣冠扶杖至堂前
車馬抱經來行同孺子方眞士文類相如未是才人物可知
逢水鏡滿門桃李一時栽

簡呼德下

平林流水帶茅堂蔣徑深深半就荒一路曉煙魚虎去滿庭
秋雨豆花香伯休賣藥青囊在玄晏耽書白髮長料得詩成
琴靜後研田纍纍小兒忙

程翼蒼翰林出爲郡博修郡學成寄贈二首

堂前書帶入秋深門外衣冠見盍簪經學講論開虎觀文章
名姓動雞林炬光尙作金蓮燄珮響還含玉署音此日已知
稽古力不教絲竹歎銷沈

郡學荒蕪不記年蕭蕭古栢草芊芊射亭礎斷樵蘇路頻水
確庵先生詩鈔卷之三

毛

泥涇浴馬泉誰損棗館成盛事重教簾業奏新懸一瓊盡視
如傳舍始信三魚屬大賢

懷屠闇伯

曾從蕭寺話深更客歲相逢別恨輕心似落英隨水去人如
明月入懷清帷中董仲成繁露枕上王充得論衡聞道春風
開講席抱經函丈走門生

簡侯紀原研德

羊裘零落釣臺星尙許江潭歎獨醒四海才名推二陸一時
人物指雙丁黃芽骨化蘇門嘯研德學仙青火光搖座右銘紀原教授
聞道東籬多種菊可容乞取制頽齡

梅村齋頭看菊卽席作

綺筵排日向花開五色繽紛入幕來香繞畫欄人不語光搖

獨酒類催碑題黃絹中郎學籠蓄丹砂吏部才成得陽秋
卷一 卷茫茫往事使人哀

時斬闖賊
事將竟

確庵先生詩鈔卷之二

美

確庵先生詩鈔卷之三

確庵先生詩鈔卷之四

婁江集

巳亥

送咸大咸歸淮陰大咸淮義士也從左蘿石北使已而

函其骨歸

俠骨猶存壯志虛吹簫擊筑意何如西州十載羊曇淚北闕
千秋郭亮書腰下青萍驚虎豹囊中白雪重璠璵君歸好問
淮陰市可有王孫尚釣魚

吳函白題勝公畫鶴見贈次韻酬之

我非蘆中人君乃天下士履運多艱難蹉跎有微指落日見
南山衡門自徙倚誦詩戒同車讀易知賁趾有時聽雞鳴中
夜蹶然起顧念天壤間寥寥二三子寧為藏用愚徒貽穉圭
訾感茲畫鶴詩敘意濡毫裏九泉媿未能鳧鷖志秋水嘆息
確庵先生詩鈔卷之四

漸遶鴻冥已千里

勝公時入武夷

家亮工兩尊人先後卽世皆以三月十九日有詩追痛

辭旨哀惻次韻贈之

三喪一恨併茲辰野哭年年係五倫雪虐風饕天有夜烏啼
花落地無春每逢家祭先思國欲報君恩敢負親聞道曼卿
營馬鬣范家高義未應淪

亮工欲葬五喪有將伯之呼

皇士撰啓禎遺詩閩中余賡之銓部贈詩四首次韻和之

鴻飛龍臥罷朝參稽古宏文昔鄭覃有道姓名傳郡北窮愁
詩句動江南垂紳委佩先公服玉軸牙籤故國函收拾殘編
無限恨十年戎馬費尋探
萬事傷心鬼一車鏑除嶽索史臣家簫韶世遠仍觀樂風雅

人亡尙採葩舊恨淒迷三矢在新愁沓靄六龍遐范車袁室
無言語載記分明當齒牙

王官心事舊恩糜落日西風戰戟麾一代傳人燈下草兩朝
遺墨案頭披身沈白馬清流禍涕灑冬青義士詩莫道中原

文獻絕羹牆尙許見吾師

永夜函關記見聞朝堂邊鄙事紛紛庾詞讒語春秋志孝節
忠規天地文血染花牋啼蜀帝淚分斑管泣湘君絕倫已遇

桓譚賞合有人將野錄焚

贈杜于皇

六月間征戰江山感廢興無家歸赤壁有夢到金陵于皇家黃州近

萬舊世亂知時命途窮見友朋茶邨詩卷在挑盡佛前燈于皇

有茶邨詩藁今寓蕭寺

確庵先生詩鈔卷之四

和陶挽歌辭哭毛子晉并序

嗚呼予與子晉締交在巳丑之秋七月而今子晉棄

我先逝則在巳亥之秋七月屈指計之蓋十年云憶

子晉之初訪予於蔚邨也陳書列毯端莊四拜訂干

秋之約予樂甚爲之烹葵翦韭草蔬同飯子晉歡若

平生賦詩投贈盡醉而去不啻如茅容之於郭林宗

也子晉遂招予移家湖上時余貧病見子晉逸氣雲

生精神滿腹竊自念託生死全妻孥誰復有如子晉

者故不遠百里而相依子晉乃授粲授屨和陶移居

詩見贈殆又如梁鴻之於臯伯通焉自是以後凡遇

青山綠水花晨月夕風窗雨樹無不交偕互答有言

必酬蓋又如陸魯望之於皮襲美矣辛卯歲大水壬

辰子又大病家人以歸耕蔚邨先返做廬乙未丙申
而後往來於玉峰虞山之間比又客館婁江歲僅得
一再過從然而不見則相思見則流連淡句相成以
道義相樂以詩歌久而敬之十年如一日顧二三年
來稼屢不登賦繁役重日不暇給微觀子晉雖理煩
治劇酬應如故而精悍之氣亦少衰矣或相對而感
額或當饗而愁嘆時時有之今春三月過子邨綢繆
縷縷似有不忍去者入夏六月則子晉病矣然子晉
雖病尙強起爲予持一杯意其尙可無恙已而聞其
病日益深亟戴星而趨視之則不及永訣矣嗚呼痛
哉予追惟十年交誼不勝死生聚散之感爰和陶挽
辭以哭之以託於古人蒿里薤露之義嗚呼子晉生

確庵先

生詩鈔

卷之四

三

而好吟詩又好和人詩今日而有知其亦將和子詩
於泉下也耶悲夫

十年如一日流光何局促中道君弃捐先我登鬼錄秋風向
夜吹颯颯聲在木天道旣可傷人事亦堪哭蜉蝣寄天地誰
夢復誰覺生者未必榮死者未必辱君其悟此理泉臺永知
足

高樓好天夜歡至頻舉觴有時泛雙湖擊鮮共烹嘗君今去
何許琴書猶在傍啣啣寒蟬鳴熒熒燈火光明月空照人與
誰同醉鄉仰天看明月低頭思未央

邊笳動高秋塞馬鳴蕭蕭銜忿過君廬禾黍尙在郊水綠自
潌洄山翠空岩蕘寒楓變霜威楊柳垂衰條豈君厭此世長
夜不復朝長夜不復朝生死情如何我生如逆旅君死如還

家呼天一長號淚盡繼以歌蓋棺見人傑關西嘆非阿楊子

棺哭曰嗟哉
乎君人傑也

入周市

江邨小市遠風塵亂後人煙慘澹新夜宿侵霜無四壁晨春
乞火少比鄰兒愁馬過柴門閉婦怨兵來酒盃貧見說捉船
供轉戰家家漁艇罷垂綸

與茂長對飲菊下二首錄一首

憶在征西幕憐君鬢已華全身天地闊望氣斗牛斜白水愁
邊夢黃山亂後家正逢人送酒休負一籬花

白明府解任以兵阻不及送別賦此寄之

縱橫帶甲兩生煙黃葉風吹下碧川一鶴已隨廉令去雙鳧
猶夢借君年東悲婁水春如海西望吳山峭入天不及離亭

確庵先生詩鈔卷之四

四

折楊柳幾回惆悵釣魚船

和皇士山居雜興四首

江關離亂事如麻元晏先生著述家已久避人依葑水又將
卜築傍梅花雪晴事變三春鳥雨過溪添一夜蛙菘地葵畦
生事足風塵回首莫咨嗟

回首風塵意若何乾坤局踳動悲歌里胥夜叩求金急塞馬
朝來帶甲過一權去時紅樹遠萬山深處白雲多仙源自在

人間世未許徵書到薜蘿

薜蘿回互草堂寬翠柏蒼松自鬱蟠亭似風流能獨立泉如
詩思恰清寒倚檐叢桂同僧悟遶屋疎梅倩鶴看閒凭曲闌
何所見亂雲疊有雙巒

雙巒相倚似君臣堯阜二峰湧翠浮煙分外親柳色門前人是晉

桃花谷口地非秦，刷雲子美長鑿柄。衝雨林宗折角巾，麋鹿魚蝦容結侶。無煩重問葛天民。

寒夜宿皇士齋次和又王歲暮雜感四首

片帆行歲暮，抱影自相憐。避世已無地，知心獨有天。回廳驚古樹，急霰下平川。幸遇鍾期在，聊鳴山水弦。

馬矢吹人面，蕭條吳市門。青山無草木，白骨滿乾坤。不有讀書樂，誰知養拙尊。與君同醉臥，絮被定奇溫。

患難周旋獨，狂歌起暮愁。時方急友人之難江明三戶冷，月黑一星流。似此干戈際，偏爲汗漫遊。與皇士又王訂遊鄧尉梅花莫相笑，筇杖自夷猶。

松柏誰云是相逢，喜賤貧雲卿。天下士，臯父歲寒人。劍有凌霄氣，衣無化素塵。及辰且行樂，吾道正艱辛。

確庵先生詩鈔卷之四

五

鄧尉集

起庚子正月盡三月

遵家君韻送諸湛庵客遊膠上二首 錄一首

一片青氈一葉舟，送君珍重道南遊。避人有地全麟鳳，呼我無心任馬牛。囊底詩篇題甲子，篋中書卷續陽秋。獨憐折盡河橋柳，難挽春風百里愁。

研山草堂與朗威夜話卽席漫成

研石山南一草堂，煙霞依約輞川莊。家家鳥語春風醉，樹樹花飛夜月狂。秉燭道書遊淨域，焚香宸翰見先皇。堂中供列皇御筆憑君重話開元日，清酒千巵淚萬行。

朗威齋得遇李膚公黃六湛吳公及三君李爲忠毅公

子黃爲介子先生子吳爲齋樨先生子

慷慨三忠裔，相逢隱者家。所南心似鐵，臯父淚如麻。短鍾隨

書卷空囊拂劒花靈巖佛國好不見有風沙

靈巖懷古

插漢珠林倚翠峰繁華銷歇剩青松溪頭水染香脂色石上
苔留響屐踪西子笑時春鳥喚鳴夷去後夕陽春歌臺舞榭
今何在不及山僧夜半鐘

山中喜遇昭法飲我以酒卽席漫賦

一夜寒香萬樹開相逢花下且銜杯窮途兄弟難成醉故國
風煙易入哀雪滿山中蘇武窖月明江上謝翱臺寸心不盡
斜陽晚溼遍青衫首重回

朱華山麓同無殊昭法愚古秋孫晚眺

趁晴扶醉入梅花行踏香蕪石徑斜白雪萬山銜落照青松
十里帶殘霞雞豚狼籍漁樵社邱壟參差富貴家蠟屐篋輿
確庵先生詩鈔卷之四
人去後疎鍾何處送歸鴉

六

贈徐次洲

山色花香併一樓潏潏清澗到門流尙平已謝塵中累
次洲五子
六孫年未四
十婚嫁已了
故人裘稱莫逆
他年高士重書傳好記青芝徐次洲

秋孫忍飢肥遯擬招同人買山助之

碧天斜插翠芙蓉卜築甘爲石戶農室有萊妻能共隱身無
呂桶可相容采薇只恐從孤竹避穀非關慕赤松願得同心
敦舊好借錢二萬買青峰

春日同素庵俟齊愚古電觀集次洲山樓分得灰字韻

書穿雲嶺去看梅向晚同登澗上臺照眼湖山俄頃變堆牀
書畫等閒開
家藏文衡山父子
書畫郭恕先雪景
空庭花影丁丁局短燭歌聲

盪盪杯五月楊梅還讓汝桂叢秋露凝重來次洲約余食楊梅子以桂月爲期

梅游紀事一百十韻

春二月初吉棹入五湖際誰與偕此行隱者柴桑裔謂愚古揚

帆信天風風靜聊小憩紆迴汲古莊挈伴相嬉戲義和馭始

遲韶光正佳麗閒訪馬扶風謂人絳帳多子弟散步齊女門

忽與山塘會晚宿白椎庵花落門空閉扣戶聞磬音沙彌出

驚視昔同毛公游伊蒲饌龕具彈指四三年老僧遂奄逝塵

禿塵滿牀香火漸零替萬事有盛衰感人亦可涕旦發度楓

橋靈巖聳煙髻下有孝廉家闔門同避世謂朝晨參須菩提

夜拜我來雞黍陳剪燭不成寐相對疑夢魂狂歌當

獻歛吾宗賢太僕結廬相偶儷謂皇種竹以爲垣壘石以爲

確庵先生詩鈔卷之四

砌買宅先買隣千金古人智始知君子交同心等蘭蕙遙望

蘄王墓峨峨古碑碣兩吳舊遺宅不知在何處靈巖山下有韓世忠墓吳

青芝在眼前插漢墮空翠緣谿一路斜放脚尋吾契門下隴

西子移居始昨歲謂秋前有板扉扇後有石丈侍環舍盡梅

花窠香爲擁衛晨夕素心人賞奇析疑義五字守長城萬卷

作生計相見喜忘言寒暄覺已贅陡然遇故人南州一高士

謂昭布襪與芒鞋荷衣而芟製獨行昔所稀苦節今無對畫

筆既空濛書法復適媚賣此供橐餽亦屬幽人事尚虞履齒

喧見客卽趨避允矣桃椎潔展也黔敖介舉世多溷濁翻以

此爲異嗟予幸相逢十載夙心慰畫出其登臨夜則聯牀第

中酒忽忘天放言無所忌或哭又或歌彷彿不能記詰朝買

籊輿且看梅花去馬駕誠可攀珍珠信可貴或踞花之巔或
坐花之內官梅方爛漫野梅未憔悴一時同游人瞠目但驚
悸歎息默無語其妙難罕譬渾如春雲凝兼似晴雪聚初疑
冰作花又道玉爲樹靜如高士迎芳若美人睡平居好吟咏
含毫便搖曳對此眞景色茫然無一句花光使人眩花香使
人醉上山香在跣下山香在袂不知花與香是一還是二銅
井又崔嵬蒼峰倚天峙壁寫匏庵詩小楷蠅頭細興來強效
顰尾續心殊媿石臺最高頂鼓勇拚一至比年履坵途蹒跚
屢巔蹶今日登巉巖兩足頗快利始悟方寸心眞能造一切
行行抵茶山豁若別世界指顧見太湖佐以煙雲勢昔年李
先輩曾此幽心寄謂長六浮雖未成其名至今在徘徊覩遺
阡再拜起長喟從游卽文孫風流雅能嗣苦無百萬錢紹此

確庵先生詩鈔

卷之四

八

前賢志壯哉潭山閣羣峰入胸次莫釐縹緲間坐觀不得濟
輸與捕魚人煙波任所暨轉陟長旂嶺仰見萬峰寺樓殿凌
丹霄規模逼象緯亭下立奇石堂前森古桂時時法華鐘無
間明與晦剖公亦人傑遠勝吾儒輩膠庠委草莽蕪穢誰一
治倒景下西厓迴車疾於駛得閒賢主人埽門已擁篲言念
乃祖德示我生曠誌謂爾音大父酌我以旨酒痛飲千百觥
觴政厥惟何射覆同一字歸來遽酣寢日出醒還未游興轉
復劇詎肯辭勞勤再適五雲洞穿鑿有別致柴莊對米堆參
差相睥睨錢家坎何奇萬象同幽祕左山不見天右水不見
地坎上十餘家懸崖眞恐墜今夜折簡招前村得徐樺謂次
言旋急過之明月久相遲山樓枕湖濱蕭然忘世慮壺傾參
斗橫唱和聲如沸樂哉成此游臨風動歸思看花不盡花似

欲留餘味曾聞尉斗柄突兀寓真趣更聞妙高峰鍊師之所

住謂貞九

鵲井驚魚澗總俟後來繼此行雖偶然宜亦天公賜

入山尙微雨十日喜晴霽俗人應笑予君行有何爲予獨不

自持俯仰適吾意此日無此行此生塵土棄明年其再來扁

舟肯濡滯

弔郁泰玄

細草春風古墓田銜泥曾記燕千千

玄性仁恕葬時有燕數千銜土行人不

爲看花至更有何人說泰玄

重游五雲洞弔顧笱洲先生

甲申歲卜隱鄧尉謀於笱洲先生先生贈以五雲洞

下笱亭古屋後以亂故不得達今日重游此地先生

已不食周粟而死石欹水澗亭榭蕭條不勝感悼情

九

確庵先生詩鈔

卷之四

見乎詞

十五年相宅來白雲深處草亭開水流花謝先生死洞口

無人滿綠苔

珍珠塢弔楊維斗先輩

關西夫子是人豪和淚題詩血漬袍

先生遇難以血寫詩此夜空山聞

鬼哭長松千尺向風號

蟠梅嘆

司徒廟前四古檜枝葉參雲倚天外強直曾經列缺焚

檜爲雷火擊離奇昔下孝廉拜

李長蘅嘗歎賞之朱華山畔雙高松亭亭骨幹

如虬龍鬱葱可容漢將坐蕭散不受秦皇封更有蟠梅致足

誇年年歲歲埋黃沙凍雪寒霜飽無數留得千花與萬花千

花萬花向人立浥露如愁雨如泣欲言不言有所思只爲春

風惜春色春風歸春色過子離離影婆娑梅兮梅兮奈老何
題積翠庵觀樹堂

何處知僧臘清陰滿戶庭花飛輕掃徑月落靜翻經一水吟
邊白千峰定裏青宗雷時過此端不媿山靈

山中遇秦弱水侍御承見枉賦贈

梁谿耆舊在扶杖看花行短棘鉤衣怯香苔襯屐輕孤臣悲
獨醒老衲話無生沿澗笙簧好春風共濯纓

次梅仙韻醉後書懷

誰云變化有鯤鵬萬事徒然感廢興雲壓蒼梧天欲淚火生
炎井地難憑消磨白日無過酒占斷青山未到僧願學吾家
灌園叟早辭楚組避於陵

四疊前韻和梅仙

確庵先生詩鈔卷之四

十

祇見蜨螂不見鵬漫天黃霧黑雲興山川夜夜蛟龍泣城社
年年狐鼠憑論到有身元似客算來無髮合爲僧梨花煙雨
清明候麥飯蕭條十五陵

次韻和雲居願公

當年哭廟解儒衣踏盡名山一笑歸黃鶴樓中新句好白牛
壇上故人稀蛙空色相宵長靜花斷聲聞曉亂飛束髮論交
頭其白含悽不語對斜暉

桃花行

過南渡緣溪而行訪得閒廬主人祝其夫婦雙壽不
遇而歸悵然而作

婁江城南古南渡二月東風芳草路榆柳參差生碧煙緣溪
種得桃千樹千樹桃花夾水濱家家戶戶武陵春桑麻雞犬

非人世中有神仙能避秦神仙避秦忘歲月碧眼方瞳鬢如雪自是東陵老故侯青門五色瓜盈噀不然或是赤松子辟穀餐芝永不死又道當今黃石公圯橋書卷知英雄神仙搖首笑不應紛紛湯擬君休聽家本南村一老翁衣冠耕鑿與時同甲子滄桑渾不問惟看桃花幾度紅桃花紅時釀作酒一飲能傾三百斗劉項分爭未足云馬曹禪讓夫何有當日乘風嬴女臺吹簫聲徹鳳皇來只今乞得麻姑爪曝日茆檐搔背好時時拍手歌徐徐弄月嘲風思有餘潑墨淋漓蚪蚪字生平不喜人間書神仙神仙何自得桃花若爲留春色凝豔枝頭不肯飛霞作樓臺錦爲國我是漁郎黃道真偶向桃花一問津神仙不見空歸去谷口茫茫何處尋

送吳興公移居下邳三首

確庵先生詩鈔

卷之四

七

我非陳孟公君乃吳季子千金重一諾結交有終始仗劍作遠遊欲爲報仇死惜哉不遇時長嘆歸故里其事雖不成其名滿人耳

昔年良宴會乃在東岡陂朱華媚清池綠樹垂修蘿酒酣雙耳熱四座起高歌別來忽如雨歲月傷人多逝水無迴瀾落花難上柯明燈見孤影短鬢空婆娑

留侯博浪椎破產曾一擊潛身匿下邳大索勞十日君今從此去想見當時蹟臨風聊酌酒慷慨生悲泣世無隆準豪并乏重瞳力長使英雄人千載無顏色

春暮結茆渡蟻橋畔與凌恂如田居相望過其室見草花百種賦贈二首

何處幽香發綠溪小隱家忘情三徑草觀變四時花白度晴

煙夜青生夜雨蛙石闌隨意坐橋外日初斜
課得花千本閒居稱此情擷芳宜作佩入藥或忘名異酒求
方釀佳蔬逐日成卜鄰歡近局頻到就流鶯

與袁石民話雨

不見袁生又一春相逢白首笑長貧伍簫志大空忘我禰鼓
才高只罵人坐聽鳴鳩催雨急生憎乳燕與時新篋中編得
遺民史舊事妻其不忍陳

三月十九日次省公伊人韻二首 錄一首

萬里烽煙萬里塵年年此日淚沾巾風偃雨憊前朝恨花落
鶯啼異代春五馬渡來猶有國雙鵝飛後更無人吳儂歌舞
渾閒事詎復傷心到甲申

淮南集 起庚子四月盡九月

確庵先生詩鈔卷之四

虎邱十詠同有仲作

張公祠

生祠肖像遍山塘寂寞中丞張侍郎至竟千秋公道在始知
天意未茫茫

五人墓

烈烈英風入夏寒豐碑屹立表江干高人義士分抔土恰似
要離近伯鸞 劉欽耳詩王重墓與相近

烈婦墓

纍纍烈婦塚成行埋骨青山草木香我欲題詩尋墓碣風流
不識有真娘

試劔石

自昔秦皇試劔石石痕猶帶薜痕斜青鋒淬得光如雪留與

他人斬白蛇

主簿祠

主簿風流異代思
亂煙斜石照荒祠
倘然不幸生今日
喜怒由人未可知

千人石

盤龍墮馬蹴香塵
載酒判花坐月頻
春去秋來一片石
朱顏看作白頭人

劒池

白虎曾傳踞一邱
金甌玉雁事難求
三千寶劒埋池底
尚有忠臣賜屬鏤

悟石軒

空向生公聞說法
依然頑石立層邱
笙歌酒肉癯如蟻
悔却確庵先生詩鈔

當年誤點頭

卷之四

三

五賢祠

雲木蒼茫變態新
五賢香火肅千春
宦游此地知多少
占斷名山有幾人

三畏齋

和靖先生此讀書
齋顏鐵畫魯公如
只今吾道多榛莽
化作三仙七佛居

次韻和高彙旃提學再得草廬詩四首 錄一首

世事無言學管寧
但看座右有崔銘
雨滋薜徑迎三益
月上松窗註六經
道脈龜山如授受
家風止水識精靈
鶴書不到潛龍地
岫幌雲關底用局

拜高忠憲公祠次有仲韻

巍巍先哲祠瞻拜動歔歔正學吾儒少孤忠異代思溪雲依
檻靜松月下簷遲能使山靈重游人或未知

寄贈蔣路然時適臥病

共道能詩蔣路然雨中新句萬人傳路然有苦雨詩秋來宋玉多愁
日賦就相如病渴年罵蠡湖頭花似雪隱鴻溪上水連天思
君不得逢君話山樹蒼蒼起暮煙

潤州懷古同宋閔叔葉嶠初瞿有仲作

鐵甕城高古潤州金焦雄峙大江流蛟龍得雨思先主豚犬
生兒嘆仲謀很石尙存髯蓋蹟算山曾費亮瑜籌三分事去
無人傑萬里煙波一片愁

所見

萬戶千門一炬焦燕棲林木雨瀟瀟藏春草暗先生塢丁卯
確庵先生詩鈔卷之四

十四

煙寒刺史橋古寺啼鳥新鬼哭空城走馬健兒驕舞雞擊楫
都成夢搔首江頭看落潮

偶感二首

楚尾吳頭埤垓斜黃沙白骨少人家艤艦去後波濤息獵馬
西風喫豆花

山勢橫江入夏寒客心向夜水漫漫無端憶著前人句北固
青青眼倦看

寄訊家謫公

自別秋風裏空潭片月閒干戈滿吳地兄弟隔燕山念汝才
方壯憐予鬢已斑遙知春草句入夢不曾慳

金山

誰向空江裏孤青插一峰潮生浮殿閣月靜遶魚龍客問中

冷水僧驚北固烽曾傳韓五婦枹鼓壯軍容

揚州雜感六首

亂餘無夢度維揚此日重游淚數行鼓角一城空烏雀風沙
千隊散牛羊笙歌院落橫樵徑燈火樓臺作戰場蕭颯祇應
前代柳顰眉含怨倚斜陽

邗溝終古水湯湯丞相身隨國運亡圖畫麒麟空列鎮湖山
蟋蟀鬪平章麗譙夜聽睢陽笛羽檄朝馳綺閣牀熱血至今
還帶碧報書曾動

王弼史忠靖也

風流年少魏王才想像芳筵舊日開夜月蘭舟停桂楫春風
玉樹照金壘仙霞恨血啼鴛去石塔悲魂化鶴來欲酌空江
一杯酒只今何地覓西臺

哭鄭天玉也

烽煙極目思依依城郭猶然風景非南寺僧亡鐘磬寂
確庵先生詩鈔卷之四

五

智西園人去管弦稀謂鄭超宗影關津梁官吏金錢窟塵市兒童袴
褶衣更憶當年謝公墅梅花零落夕陽微

看看賓榻藉高眠忽忽蘇卿塞外年一別十年矣入夢尚疑吞鳥
藻移情還記撥湘弦春衫夜踏瓊花觀綺席新歌燕子箋此

懷魯載馨也

日聞君最蕭瑟種瓜已傍邵平田
錦帆天子下揚州清夜曾招殿脚遊十里香風吹水調甘橋
煙月帶迷樓高臺舞罷呼韓恐玉樹歌殘後主愁至竟繁華
有憔悴雷塘博得似沙邱

悲隋場帝也

送別嶠初

天意留我黨行藏豈爲身十年曾不字一出係斯人才大心
偏細情多意更真瘡痍殊可念努力濟時屯

早發

掛席貪風正平波淼淼天殘星茅店火初日柳堤煙健婦栽
秧早仙車灌水便昭陽俗婦人插秧風車戽水催忙聲定急歸夢繞園田

江南有催忙鳥卽布穀也

贈陸元圃元圃昭陽隱士也坐臥小樓十餘年矣

年年高枕小樓中祇有羊求一徑通芳草似愁凝暮雨落花
如夢怨春風人能古道偏宜隱詩到工時只合窮千里尋君
無限思凭闌惆悵夕陽紅

昭陽雜詠十首

昭陽墓

城角風高落日懸登樓西望水如天昭陽古墓知何許十里
平湖一點煙

濯纓亭

確庵先生詩鈔卷之四

六

滄浪亭畔水禽鳴應有題詩錢舜卿幸得素衣緇未化不煩
到此濯塵纓

務子角

徐王旌旆動風雷入幕吟成思魯才蔽壘黃埃渾似昔當山
紅日有誰來徐中山兵至務子角顧思魯獻詩云黃埃蔽壘腥雲暗紅日當山陣勢高遂留幕下

得勝湖

得勝當年事有無紛紛水鶴與沙鳧孟威不見張榮少寂寞
秋光月一湖孟威張榮宋義師也

其極臺

劃然長嘯讀書臺爲客慚無作賦才解道長天陷西北極星
移向日南來臺南向某先達讀書其上

東園

池臨海子諫臣家園傍海棗樹離離正放花留得赤心還報
國何如五色故侯瓜

屈原廟

寒食家家斷曉煙朱明偏競水嬉船游人寂寞笙簫冷可似
靈均憔悴年興化俗無競渡

韓樂吾先生祠

朕篋探丸白晝時斷煙流水雀聲悲浮糧五歲誅求急誰誦
韓公論盜詩

李文定公祠

相國祠堂異代垂君恩十世子孫知當年最羨歸田日白髮
雙親健飯時

雙鴛塚

確厓先生詩鈔

卷之四

七

黑風吹雨失江邨漠漠愁雲斷客魂十里蓮塘天際遠不知
何處瘞雙鴛

草堂讌集詩序

余踰伏蔚邨多历年所客有過衡門而至止者輒不
能答去則忽忽如有所失惟對清風朗月以爲太息
一日讀嵇康傳每一相思千里命駕喟然嘆曰噫今
人何遂不如古人哉於是囊書襆被涉波濤冒戎馬
而訪李映碧先生於昭陽之食邑既見之明日乃求
高士陸元圃宗子發李謙吉之廬而一一遍訪之
數子者皆先生向所稱道於予予思其人而不得見
者也已而諸君子忽置酒招予至則開一草亭匡坐
其下亭可方丈許碧闌曲檻軒敞受風樹影竹色參

差可愛在座者則李艾山元又九畹及從游瞿有仲
八人而已賓筵秩秩邊豆不亂酒半予乃酌諸君子
而告之曰嗟乎天下事尙忍言哉夫子繫乾之初爻
而曰龍德而隱者也士生今日不具變化之才霖雨
之用惡在其爲隱哉三代以下有其德者惟南陽之
臥龍然其言曰苟全性命於亂世不求聞達於諸侯
信斯言也三顧無先主則亦躬耕老耳此其所以能
屈能伸而與伊呂相伯仲也揚雄草創太元寂寞清
淨然其卒也劇秦美新論蓋于古文中子之學醇乎
醇者也太平十二策所獻非其時君子惜之然則儒
者之立身持已進退言動之際其可不慎乎哉願諸
君子相與勸之將以此亭爲息壤也諸君子皆逡巡
確庵先生詩鈔卷之四

太

避席而興曰敢不早夜以思無忘今日之會乃人占
一韻各賦五言詩一章予遂書一時座中之語以序
其首

芴亭天地在吾黨尙能容草色青袍暗林光綠酒濃江潭愁
正則時屈重午昭陽有湖海媿元龍吳楚傷心處浮雲蔽幾
重屈原廟予往拜之

弔高文義公

諱毅正統景泰中相國

枋國方多難遭逢主聖明袖書千戶重解帶舍人榮鎖院持
公道窮簷感義聲兩朝賢宰相不媿是科名

別李艾山

細雨如絲草似秋片帆明發動離愁十年刺字逢知已一夜
簫聲見白頭海內秦煙驚逐鹿天涯楚調和哀鳩艾山有蘧哀鳩詩

知鶴髮孤邨裏倚遍衡門月一洲

上吳鹿友相公二首

相公出處係安危其奈佯狂避世時誰誤國家千古恨獨存
忠孝寸心知高樓夜月劉琨嘯短屐春山謝傅棋閒檢當年
舊封事蕭蕭霜鬢淚如絲

避兵自古說昭陽白露兼葭水一方漁火不驚鷗夢穩邨醪
初熟稻花香漢宮舊臘存王社楚調新歌祭國殤應有草堂
詩萬首春來花鳥待平章

映碧橋梓攜樽餞別於五里亭又以义兵船衛送至秦

因詠二首錄一首

萬方多難日豺虎正紛紛異縣誰憐我同心正憶軍煙分邨
岸鼓波接海門雲喜免長途戒魚义張一軍

確庵先生詩鈔卷之四

充

題宮紫元春雨草堂

西湖春雨澹於秋西湖春雨吳背郭堂成象外幽溪過落花
無魏晉徑開芳蘚有羊求一門龍勝高陽里五色瓜如故國
侯著就奇書作奇字與酣搖筆鬼神愁

舟過曲塘

掀天波浪打頭風鼓角無聲野戍空稍喜荒邨有人住綠楊
影裏見牛宮

贈吳白耳

相憶全憑尺素書一江無奈隔雙魚門多嫺禮胡安定足不
窺園董仲舒四海干戈愁裏共孤邨風月別來虛癸巳白耳
翩翩喜見聯珠美陶令男兒恐不如白耳五子
季大來同年聞予渡江棹舟候於泰州至則予過矣乃

以書招予其詞酸楚謂一別十九年矣人生有幾十九年耶苦不能往因作詩寄之

曾是蘇卿十九年傷心同老牧羝天戍笳吹落江頭月烽火燒殘海角煙千里逢迎空鷁首兩行騷屑託魚箋相思不得成相見漠漠雲山意惘然

贈宗彥先

識得鵝湖物外身綠杯光照白頭新尋詩每愛移情句求友都逢學道人茶裏槍旂圖八陣書中絲竹動千春偶然避雨成風俗半是林宗墊角巾

得全堂夜譙次巢民原韻四首

千里烽煙入夢寒殘山剩水異鄉看愁時似我傷心易好客如君亂世難堂上銀箏催柘舞江頭瑤柱薦盤餐豔歌三疊確庵先生詩鈔卷之四

停雲後月落參移玉漏殘

辭家三月客愁繁柳色青青欲斷魂龍舌津頭初病酒時方從昭

到鳳池亭畔又開樽曾驚奪隘三更鼓尚笑連營百里屯回

首畫屏詩卷在中原耆舊幾人存巢民裝潢師友贈詩爲屏障

無雙國士數徧奇啼笑於今總不宜淝水功名絲竹裏江洲

涕淚琵琶知入山只合招裴迪傾蓋空勞說項斯五都有爲巢民援引

而二三世路風波誰最險一回搔首一回思

楊枝桃葉緩聲歌吹落天涯別淚多幾樹啼烏驚鼓角一天

圓月照藤蘿周郎才調應難並巢民善願曲庾信江山未易過客

路明朝向何處紛紛鐵馬共金戈

再譙得全堂爲主人者皆遊於吾師我完先生之門者

也追悼吾師泣然有作

絳帳曾來邊孝先傳經誰笑腹便便填門夜雪長三尺對客
春風滿四筵一自龍髯歸紫極便將蟲臂付青天笙歌此夕
叨佳宴獨有侯芭最泣然

和有仲觀劇斷句十首贈別巢民

揚州曾記識君時白面何郎傅粉疑顧曲風流渾似昔可憐
雙髻已如絲

十五徐郎舞袖垂秦簫歌罷又楊枝魏公未是知音者但有

新詞付雪兒

曲曲明珠轉玉盤聲聲吹向碧雲寒無端愁殺江南客袍笏

威儀見漢官

燕子傳箋未子虛多情紅葉御溝如何當化作南飛雁好寄

蘇卿塞外書

歌燕
子箋

確庵先生詩鈔卷之四

主

處士摻搗氣最雄文長暮晝調偏工緣知橫槩題詩膽半落

漁陽一鼓中

歌漁
陽弄

秦簫北曲響摩天刻羽流商動客憐擬譜唐宮凝碧恨海青

心事倩伊傳

雪滿弓刀血裏中燕然山下夢中身楚囚灑遍新亭淚不見

邯鄲作夢人

歌邯
鄲夢

莫笑盧生一枕空神仙亦在夢游山蒼蒼煙霧茫茫水何處

蓬萊綠髮翁

琵琶胡馬漢宮衣萬里風沙去不歸南望玉關齊一哭可留

青塚似明妃

歌青
塚

輕煙落日柳絲長水樹風生菡萏香莫道江南歸夢好離歌

此地斷人腸

將疆
話別
于水
繪園

秦蕭歌

堂上奏葡萄堂下奏雲璈左盼舞徐蔡右眄歌秦蕭秦蕭調
最高當筵一曲摩雲霄邯鄲盧生橫大刀磨崖勒銘意氣豪
漁陽搥鼓工罵曹曹瞞局踰如猿猱長安市上懸一瓢義聲
能激袁家燹歌卽聊漁陽義盧燹諸曲一歌雨淙淙再歌風蕭蕭三歌四
座皆起立欲招鳴鶴驚潛蛟喜如蘇門嘯思如江潭騷怒如
秦廷筑哀如廣武號引我萬種之愁腸生我一夕之二毛淚
亦欲爲之傾心亦欲爲之搖吁嗟乎秦蕭爾居楚地但解作
楚歌胡爲乎悲壯慷慨乃能爲燕趙之長謠我愛秦蕭聲不
惜秦蕭勞願將義士忠臣曲遍付秦蕭緩拍調君不見黃幡
綽敬新磨嘲笑詼諧何足慕惟有千秋雷海青凝碧啼痕感
行路

確庵先生詩鈔卷之四

三

定惠寺弔文丞相

丞相蹈海時曾游定惠寺欲以一人力區區醒天醉當其聞
變初一朝屏聲伎亦知功不成庶幾遂厥志要爲千萬年存
此君臣義我來弔公蹟愁雲滿天地四顧生慨慷精靈颯然
至撫運同艱難臨風起長喟

留別雉皋諸公八首

吳山一片雲從風渡江
北北道多主人爲我傾醞
醱堂上弄清謳堂下紛
絲竹白日忽西沈圓月
淨如玉客醉賦言歸主
情歡不足意氣能傾人
一飲三百斛舉世重黃
金雲雨在翻覆願保青
松心歲寒永相勛

昔我雨中過青青一池柳
今我雨中歸灑灑千杯酒
雨亦不停流林亦不去手
折柳送予行主人意何厚
願此纒綵歡其

其忍別離否流光如飛電浮雲似蒼狗浩渺一江煙能得幾
聚首去去勿復陳雨聲愁殺人

家本鹿門山不入襄陽市翩然絕大江一朝走千里喜遇素
心人夏宗與白耳白耳白頭交宗夏傾蓋始論學溯淵源門
牆其天水相見顧而笑不言乃心喜卓哉程朱學期君共興
起天未喪斯文吾道其北矣

昔時胡安定道開濂雒先經義與治事門下資陶甄雍雍嫻
禮樂後起多英賢雒臯篤生地風流至今傳明允吳周靜淹
通石月川同堂異膏火疑義相鑽研我今別君去分手如雲
煙願言各努力及此英妙年

曾聞先正言禮失求諸野學校久陵夷大道如土苴鳳池七
八子乃紹鵬湖社白雪調誠高寥寥和者寡我幸從之游習
確庵先生詩鈔卷之四

雪

禮大樹下譬彼靡靡中忽奏黃鍾雅惆悵從此別誰可與語
者

世無瓊玉漿亦鮮金光草白日頹朱顏去去如飛鳥亮非金
石姿焉能長不老渺然靈明臺天地同壽考孔孟及今存顏
淵未爲天願君持此身千秋以爲寶

誰謂泰山高攀躋亦可登誰謂滄海深方舟亦可乘堯舜同
此心不爲非不能是以古君子夙夜必兢兢法天在不息入
聖期有恆博我以大道翹首望良朋

蔡君好任俠高義似朱家此風世久絕君言毋乃夸我來一
問君四顧但長嗟自言少年時行踪半天涯燕趙多貴客萬
里走京華贈君珊瑚鞭乘以白鼻駒夜醉酒家胡小婦彈琵琶
一笑千黃金棄去如塵沙君年已半百壯志還未賒此地

幸逢君如見故園花明日別君去風雨孤舟斜欲借秦簫鼓
爲君起三搥

海陵歸途憶寄映碧橋梓兼別昭陽諸公五十韻

十年不出戶出戶便千里輕舟湖大江特訪昭陽李李公舊
廷尉高處古無比朝餐陽山薇暮採湘江芷寂寂棗園居一
池臨海子澹寧以名齋其中有妙理坐擁萬卷書百城差可
擬庭前種雙梅左右宛相倚右株根柢閒忽發芳菲藥想見
天地心元化實資始公家有三鳳文采冠都鄙玉樹河翩翩
象賢稱繼起積厚者流光朕兆毋乃是宗人又多才往往嫺
詩禮或覆白疊巾或隱烏皮几或荷伯倫鍤或曳東郭履或
學希江都或詩宗子美始知文定裔舊德固如此時而攜樽
過有酒多且旨時而折簡招不盡醉不喜流連竟忘歸時曰
確庵先生詩鈔卷之四

十四

不能紀曰子性固陋涼涼而踽踽不見乘車人但求戴笠士
雲間四五輩高蹈厲廉恥我爲叩其盧一見驚水乳有亭延
我入逢迎急倒屣商山古衣冠彷彿追黃綺剪韭且烹葵炮
鱉而膾鯉旣探風雅源亦復論經史厥惟投淵日再拜三閭
氏已遊八蜡壇風俗尙古處巍巍丞相祠肅肅真儒陞皆得
登其堂高山遂仰止明日別公歸片帆乃南指豈期行路難
豺虎紛如蟻公獨遠相慰衛我義兵艤銜戟有餘情冥報將
何以去去過海陵爰館鳳皇湊東道多主人淹留二旬晷忽
然風雨聲攪入愁人耳黑蜨躍於淵商羊舞於市東風西風
雲上河下河水十里煙漫漫百里天瀾瀾昨夜海安邨川壅
陂塘圯隄防一以決洪流去如駛牛宮沒波濤漁舍沈沼沚
遙念昭陽城窪下如釜底遭此懷襄災不知有何恃只恐隴

畝間家家廢耘籽神禹不復興民其爲魚矣更憶柴桑宅水
或及牀第卑溼似長沙得無傷棗柿是以行役中愁思不能
已悠悠故人心舐墨用書紙書亦不盡言寫懷聊爾爾

送吳宏人徙塞外二首

要離冢畔泣吳生萬里蕭條塞外行江水遠流遷客恨鳥言
初換異鄉聲秋風黑雨千山道暮雪黃雲五國城莫謂生離
非死別臉波端可濯塵纓
凄風落日叫鴝鵒雙袖龍鍾送楚囚詔下金雞千里夢書傳
黃耳一門愁鶴歸定想依華表狐死何曾忘首邱對面九疑
人未識傷心那忍聽篳篥

東臯和王無功韻留別嚠郊諸兒

王無功隋之逸民也逃於酒自號斗酒學士有柴桑
確庵先生詩鈔卷之四

三

之流風其作東臯野望詩感懷於落暉秋色有殘山
剩水之思而終之以長歌采薇一語寓意深遠詩家
論世知人心以無功爲首予思其人而不可得見久
矣庚子秋放棹嚠郊嚠故有東臯一社一時有數君
子皆躬耕讀書志乎古人之學而吾友湛庵卜隱其
地相與晨夕予至則諸友皆開尊延予欣然命酌
酒酣耳熱乃援筆而和此詩且訂移居南邨之約予
高尙不如無功而好酒頗近之然無功尙致憾於相
願無相識而予則有數君子以爲依歸其所得不已
多乎

東臯效君子相見晚依依脫帽臨秋水開尊坐落暉平岡千
樹合遠浦一帆歸擬卜南邨宅同心共采薇

山響齋詩賦贈張鶴民

濛濛塵壒中張生特清妙晨炊突無煙天子不能詔詩心冰
雪寒畫筆煙雲峭有時援琴彈技也進乎道四壁如空山秋
風鳴萬竅舉世尚淫哇誰哉識古調靜觀殊自精下士啞然
笑

確庵先生詩鈔卷之四

美

